

光緒重修天津府志

重修天津府志序

郡邑之有志蓋古矣史氏之職也然  
秉運之盛衰每視時代為轉移往  
一隅之域有闕天下之重輕於今昔  
形勢不能強同為一志者所必詳而  
核簡而略始足以任事而傳後焉天  
津在五代以前與訪表見宋遼之際  
猶黃甌脫元人舉行海運乃於此地

後官接運態樣未以天津之名明永  
樂間始置天津衛

國朝由之雍正四年改衛為州隸於河  
間九年升州為府附郭設天津縣而  
以滬州鹽斤屬南皮縣以黃河及河  
間之靜海青縣移屬于此濱海風  
擅魚鹽之利又為東通運道之衝  
廣輻輳關閘之衝士俗以而多文

其民實直而為孝誠畿甸一大都會  
也載濤庚申北洋開埠通商洋郡實  
為總匯之區東西各國皆設領事以  
轄其商民於是

朝廷特設三口通商大臣以鎮撫之計  
以輯睦邦交綏懷民志責基重也同  
治庚午法國教案事定乃以直隸提  
督李鴻章大臣常駐節於津門激調

重刊三月六日  
京軍鎮國海防遂屹然為北門重鎮  
自天津一隅之地所以拱衛

京師拱扼山海且有開於天下之重經  
此豈淺鮮哉方志輯於乾隆四年以  
時遠近未久紀述難詳越百數十年  
而沈太守家本東守先邦諒於大方  
開而重脩徐主政宗亮輯而末竟蘇  
大令居盛時而成之凡為紀人表

二為考二十九為傳十六考為五十  
四卷剽剽沈竟李太守蔭振請序於  
余受而讀之其書大抵取裁於載輔  
新義而志為採州縣志旁及經史  
百家撰述凡矣

列聖之天章累於之

詔諭方輿異紀之數風俗物產之詳仕宦政  
績之尤人物科名之盛河道堤防之

原委由田鹽法之大凡海防營制之  
分合通商租界之遠近畧示綱舉目  
張條分件舉洵乎詳而能核簡而能  
映強足以信人而傳後者而余於此  
尤有進焉夫天津為左輔重地方之  
時局日新強鄰環伺其首形勢大不  
相侔故明土之果能休養生息因時  
制宜庶幾前必後之方勵敢懷同仇

之志則足以張

國勢而伐敵謀此將胥於是乎至是則  
余之訪厚也又嘗借汲史考教為  
里表守土之責也哉時作

光緒二十五年歲次己亥十一月

誥授光祿大夫頭品頂戴兵部尚書都察  
院右都御史候補直隸等處地方管  
巡撫事務理河道提調銜兼管長蘆鹽



政

欽差北洋通商大臣長白祿祿序於天津

行署

重修凡例

方志源於史書以綱統目條理始明今用紀表考傳爲綱分門內類次爲目首紀

皇言次紀

恩澤固仿

畿輔通志遠秉春秋尊王之義抑仰見

國家政治損益上取進止足爲全書綱領凡爲紀者  
七

志有御繁以簡非表不明如沿革封建職官科目  
是也津郡職官歷代多殊科目近時尤盛或分或

併於各家志例畧事變通凡爲表者十一

方志以輿地爲重輿地尤以圖說爲重當修志定議專使留意測量者於屬地周行履勘舉村莊河道一一考究其實爲府總圖一州縣分圖七列入疆域不另爲卷至於星野祥異一隅之地未便妄爲援引僅列晷度於疆域之前餘如輿地所載悉以類次凡爲考者八

經政爲治理大端分門紀述乃志書通例今畧仿畿輔通志各以類從凡爲考者十

藝文金石宜各爲篇特津郡藝文無多金石尤落

落可數今總於藝文別以著述金石二目著述只載書名金石斷自元代亦通例也凡爲考者二

名宦入祠

國典綦重非敢妄爲擬定兩廣通志代以宦績卽偏長一節當之無媿

畿輔通志因之茲仿其例凡爲考者二

傳立多門昔人譏爲繁碎

畿輔通志以列傳雜傳列女概之然一郡之志僅備國史要刪未便僭爲定論加以時代先後州縣諸志類多不詳祇就原門酌爲合併以便觀覽生存之

人不錄節孝及年則異此例首人物次列女次殉難士女凡爲傳者十四

徵引書籍必注所出所以懲杜撰也今自舊籍而外近年所采厥有數類曰舊通志新通志皆

畿輔通志也曰前志乾隆四年所修府志也曰州志

縣志總諸州志新舊志名之也

滄州新志未刻稱州志稿

曰檔

案檔冊院司以下公牘所出也曰請旌冊津郡紳士立采訪忠孝節義局彙報院司入奏所具姓氏事實也曰采訪冊諸州縣官屬紳士先後舉報入志事宜也曰測繪冊專使履勘輿地所具圖說也

全書所徵一一注明庶便覆審其他例由義起文  
因事變則各隨加按語分注下方府志初於乾隆  
四年其時升州爲府甫經草創規制未備今更百  
有餘年矣海防議起督府移駐於此治理尤爲繁  
重沈子惇太守蒞任倡議增修適閩藩季士周布  
政方任長蘆運使慨允協籌經費陳之大學士前  
總督李伯上下詢謀僉同設局興事蓋光緒廿有  
一年之夏徵事具文爰卽是年爲斷以示限制凡  
越三年告成都爲五十四卷

右例言八條去秋徐主政一手集成旋卽歸去書

將剗刪俞孝廉言未可李少雲太守因屬不才覆  
觀一通始見諸多脫誤時已手民畢集經費又僅  
有存不能重纂遂議去其太甚者屬不才與同人  
隨改隨刻榮伯衡太守受代亦無異議迄今將竣  
於初稿所分紀表考傳四綱未有改變其紀七卷  
內惟卷二多所增補表則僅存沿革封建二卷職  
官選舉科目俱改爲考共計二十九卷因宦績二  
卷由考改傳故傳共十六卷合之仍五十四卷此  
中全改者爲職官選舉宦績人物四門餘如輿地  
經政間有改及半者不得不改之故具詳各卷案

語

不僅此數卷凡案語不作按字者皆鄙說

茲不勝贅述大率初稿係

束閣前志惟新通志是刈是穫而未計其體製靡異尤未審其舛誤本多有必不可沿襲者鄙意則謂他志各自行世惟前志板毀難得是非大謬空言無甯過而存之卽其失亦當據他書以正而不可遽棄也區區此心不能自己而校刊期止半載竭其綿薄夜以繼日僅克成之無望暇整自知止能銷融大錯差勝新通志一籌而已初稿所引羣籍只據新通志未檢原書沿誤自必不免故改纂所及輒聲之亦知本書尙存卽戒轉引而弗能救



者非但迫促不及且書亦不具故惟有據實不敢欺詐焉耳己亥夏杪蔡啟盛識

總目

卷一 紀一

皇言一

詔諭

卷二 紀二

皇言二

詔諭

卷三 紀三

皇言三

詔諭

卷四  
紀四

皇言四

聖製

卷五  
紀五

恩澤一

卷六  
紀六

恩澤二

卷七  
紀七

郵政 附義舉

卷八 表一

沿革

卷九 表二

封建

卷十 考一

職官一

歷朝

卷十一 考二

職官二

歷朝

卷十二 考三

職官三

國朝

卷十三 考四

職官四

國朝

卷十四 考五

職官五

國朝

卷十五 考六

職官六

國朝

卷十六 考七

選舉一

歷朝

卷十七 考八

選舉二

國朝

卷十八 考九

選舉三

國朝

卷十九 考十

輿地一

晷度 疆域輿圖

卷二十 考十一

輿地二

山水

水道圖說  
治河諸說

卷二十一 考十二

輿地三

重修天津府志卷之二十一 雜錄

隄閘 津梁

卷二十二 考十三

輿地四

古蹟 冢墓

卷二十三 考十四

輿地五

城鄉

卷二十四 考十五

輿地六

公廨 附租界

卷二十五 考十六

輿地七

寺觀

卷二十六 考十七

輿地八

風俗 物產

卷二十七 考十八

經政一

田賦

附 旗租

卷二十八 考十九



經政二

屯田 戸口

卷二十九

考二十

經政三

漕運

卷三十

考二十一

經政四

海運

卷三十一

考二十二

經政五

倉儲

卷三十二 考二十三

經政六

鹽法

卷三十三 考二十四

經政七

權稅

卷三十四 考二十五

經政八

祀典

卷三十五 考二十六

經政九

學校

卷三十六 考二十七

經政十

兵防 驛遞

卷三十七 考二十八

藝文一

著述

卷三十八 考二十九

藝文二

金石

卷三十九 傳一

宦績一

歷朝

卷四十 傳二

宦績二

國朝

卷四十一 傳三

人物一

重刊三才圖會  
卷四十二  
歷朝

卷四十二  
傳四

人物二

歷朝

卷四十三  
傳五

人物三

國朝

卷四十四  
傳六

人物四

國朝

卷四十五 傳七

人物五

國朝

卷四十六 傳八

列女一

歷朝

卷四十七 傳九

列女二

國朝

卷四十八 傳十

列女三

國朝

卷四十九

傳十一

列女四

國朝

卷五十

傳十二

列女五

國朝

卷五十一

傳十三

列女六

國朝

卷五十二  
傳十四

列女七

國朝

卷五十三  
傳十五

殉難士女一

卷五十四  
傳十六

殉難士女二

職名

鑒定



太子太傅文華殿大學士一等肅毅伯

欽差北洋大臣總督兼管河道鹽政

李鴻章

安徽合肥

欽差北洋大臣兵部尚書

頭品頂戴總督兼管河道鹽政

王文韶

浙江仁和人

欽差北洋大臣文淵閣大學士

總督兼管河道鹽政

榮祿

滿洲

欽差北洋大臣兵部尚書

頭品頂戴總督兼管河道鹽政

裕祿

滿洲

頭品頂戴承宣布政使司布政使

裕長

滿洲

二品銜清河道署按察使署布政使潘駿德

安徽涇縣人

頭品頂戴承宣布政使司布政使

陳寶箴

江西義甯人

承宣布政使司布政使

王廉

河南祥符人

二品銜鹽運使升按察使署布政使季邦楨

江蘇江陰人

承宣布政使司布政使

員鳳林

陝西三原人

承宣布政使司布政使

廷杰

滿洲

頭品頂戴提刑按察使司按察使

周馥

安徽建德

二品銜候補道署按察使

朱臻祺

江蘇江甯

二品銜都轉鹽運使司鹽運使

李希蓮

山西平定

二品銜天河道升鹽運使署按察使李興銳

湖南瀘陽

二品頂戴天河道署鹽運使署按察使

方恭釗

浙江仁濟

二品銜候補道署清河道兼署按察使

晏振恪

江蘇儀徵

二品頂戴鹽運使

署布政使升按察使

覺羅廷雍

滿洲

二品銜提刑按察使司按察使

周蓮

貴州貴筑

二品頂戴候補道署鹽運使

余昌宇

江蘇武進

二品頂戴都轉鹽運使司鹽運使 景星 滿洲

二品銜都轉鹽運使司鹽運使 萬培因 福建崇安

頭品頂戴津海關道兼鈔關監督 盛宣懷 江蘇武進

二品銜署津海關道兼鈔關監督 黃建允 廣東順德

二品銜天河道調津海關道 兼鈔關監督 李岷琛 四川安縣

二品頂戴永定河道署天河道 呂耀斗 江蘇陽湖

二品頂戴清河道署天河道 高驂麟 浙江仁和

二品頂戴候補道署天河道 任之驊 江蘇宜興

監修

三品銜在任候補道並 加二品頂戴 沈家本 浙江歸安

三品銜道員用並加二品

頂戴署天津府知府

梁丹銘

山東博山

三品銜在任候補道並

加二品頂戴天津府知府

潘青照

安徽桐城

鹽運使銜道員用並加

二品頂戴署天津府知府

李蔭梧

河南延津

三品銜在任候補道並

加二品頂戴天津府知府

榮銓

湖南

纂修

候選主事世襲騎都尉

徐宗亮

安徽桐城

提調後兼覈正

同知直隸州知州用並

加四品銜分缺先用知縣

蔡啟盛

浙江諸暨

考訂

舉人

俞宗謙

浙江歸安

采訪

三品銜道員用在任候補

知府天津河防同知

馬清泰

浙江桐鄉

道員用候補知府署天津河防同知林際康

浙江定海

天津縣知縣

王兆騏

江蘇陽湖

陳鴻保

浙江海鹽

呂增祥

安徽滁州

青縣知縣

潘江

安徽婺源

沈景初

浙江

靜海縣知縣

史曹韶

江蘇宜興

滄州知州

成肇康

江蘇寶應

李禹言

山東歷城

吳雲溥

南皮縣知縣

殷樹森

江蘇昭文

鹽山縣知縣

夏聲喬

湖南善化

慶雲縣知縣

銘彝

浙江嘉興

馮麟淮

天津府儒學教授

傅楫

漢軍

天津府儒學訓導

張之翰

滄州儒學學正

王乾三

奉天

滄州儒學訓導

孔昭銓

廣東

鹽山縣儒學教諭

王麗堂

故城

鹽山縣儒學訓導

常世昌

冀州

慶雲縣儒學教諭

姜連清

文安

慶雲縣儒學訓導

雙琦

東安

舉人

胡濬

天津

拔貢

陳文煜

安州

校勘

舉人

方荃

安嶽  
桐城

五品銜候補鹽場大使

卓德徵

浙江  
錢塘

生員

蔡宗沈

浙江  
諸暨

生員

劉寶廉 天津

生員

劉寶和 天津

測繪

候選縣丞

何則賢 安徽桐城

監刊

儘先試用典史

陳廷學 浙江諸暨



重修天津府志卷一

紀一

皇言一

詔諭

按此門諸志所載以外兼上采

九朝聖訓東華錄諸書近事則檔案邸抄居多茲不敢一

一瑣注其總曰

皇言者用永清縣志例也

順治十一年二月

諭戶部曰四海蒼生皆朕赤子飢寒轉徙深切痼瘼前各

督撫疏奏災荒等處已經查照分數酌量蠲免各府州

縣衛所等官務在實力奉行不得混徵徒飽貪腹極荒

地方非蠲免所能救者該督撫速行查奏另加恩恤至

重刊三朝元覽卷一 詔諭  
於畿輔重地房屋田土多經圈占加以去年水荒特甚  
尤爲困苦朕夙夜焦思寢食弗甯極宜拯救庶望生全  
但荒政未修倉廩無備若非頒發內帑何以濟此急需  
茲特發庫貯銀十六萬兩

聖母皇太后發宮中節省銀四萬兩朕又發御前節省銀  
四萬兩遣滿漢大臣分赴八府地方賑濟督同府州縣  
衛所各官量口給散務使飢民均霑實惠

十二年八月

諭工部曰畿輔之地乃天下根本必加意安養使民生樂  
業方能自近及遠漸致太平前爾部會戶禮兵三部覆

奏修築運河決口議將直隸八府州縣節年所欠各部  
寺錢糧速行催解以濟修河急用朕念畿內地方人民  
艱苦房地屢經圈撥水旱連歲相仍既缺養贍之資俱  
有身家之累而歷年積欠一旦並徵其何以堪殊非加  
惠近畿篤厚根本之意朕心深爲不忍爾部仍會同各  
部將修築決口應另用何項錢糧悉心籌畫確議速奏  
其直隸八府州縣順治八年至十一年未完錢糧實欠  
在民者悉與蠲免

康熙二十四年四月

諭戶部朕撫御方夏愛養黎元早作夜思勤求治理閭閻

疾苦無時不深軫念欲使民生樂業比屋豐盈惟當已責蠲租萬姓得沾實惠直隸地方頻遇旱災小民匱乏宜加恩恤順永保河等處圈占地方應徵康熙二十一年地丁錢糧已經詔行蠲免所有直隸八府康熙二十三年未完地丁錢糧盡與豁除其順永保河未經圈占地方及真順廣大等處康熙二十四年應徵地丁各項正賦俱著免三分之一爾部速行該地方官通行曉諭務使人人得被膏澤以副朕勤恤民隱至意如有不肖有司借端朦混私行重徵者或經參奏或被告發定行從重治罪爾部卽遵諭行特諭

二十五年九月

諭戶部自古帝王撫馭九有軫念民依凡鞠謀生養爲計甚周猶以賜復蠲租爲布德行仁之要務朕嘉與海內元元共圖樂利弛征減賦時厯於懷惟頻渙恩施俾萬姓得沾實惠念直隸畿輔重地天下根本寬租之詔屢沛往年但順永保河較之畿南諸府差役倍多供億尤劇應加軫恤又湖廣湖南福建四川貴州地方昔年爲賊竊踞民遭苦累今雖獲有甯宇更宜培養以厚民生應一體蠲免用昭愷澤直隸順永保河四府及四川貴州兩省所有康熙二十六年應徵地丁各項錢糧俱著

蠲免二十五年未完錢糧亦著悉與豁免除湖廣湖南福建兩省所有康熙二十六年下半年二十七年上半年地丁各項錢糧及二十五年未完錢糧亦與盡行豁免爾部速行該地方通行曉諭務使人民均被恩膏以副朕愛育蒼生至意如有不肖有司官役借端朦混及私行重徵者該督撫指名題參從重治罪如該督撫徇隱不行糾舉或經參奏或被告發定行一併從重治罪爾部卽遵諭行特諭

十二月

諭戶部朕惟自古帝王撫馭寰區勤宣德意必軫恤民隱

加惠閭閻俾黎元樂業比戶豐盈而後化協時雍治登  
隆理朕念切民依鞠謀生養欲使羣生樂利幹止甯成  
惟頻行減賦蠲租庶萬姓得沾實惠前念直隸畿輔重  
地王化所宜先大沛恩膏用培邦本而順永保河四府  
地方人民較之畿南差役倍多煩苦故將康熙二十六  
年地丁各項錢糧同湖南福建四川貴州四省錢糧盡  
與豁免比慮兵餉或有不敷真順廣大四府地方未經  
一體蠲免今聞此四府人民閒有艱苦朕心深爲軫念  
宜速施渥澤均示仁恩著將此四府康熙二十六年地  
丁各項錢糧盡行蠲免爾部速行地方官通行曉諭務

使人民均沾實惠以副朕愛育蒼生至意如有不肖有司官役借端朦混私行重徵者該撫指名題參從重治罪如該撫徇隱不行糾舉或經參奏或被告發定行一併從重治罪爾部卽遵諭行特諭

二十九年二月初三日

諭內閣九卿詹事科道昨歲畿輔荒歉朕慮民食維艱或至流離道路旣蠲除其田租矣復特發帑金三十萬兩并動支常平倉粟令該撫徧行賑貸蓋期災黎得所毋使離散也今聞通衢相近之民雖已獲霑恩澤而僻壤窮簷究不能以自存致於越鄉去土者甚衆夫小民流



移若此則司牧大吏所賑救者安在耶前所發三十萬帑金未審如何散給所在人民有無轉徙應遣部院大臣往加詳察至於四方流民率多就食京師今年五城粥廠雖經倍給銀米寬爲其期但恐饑氓漸集無以備贍罔克均霑實惠宜增設粥廠擇各部滿漢賢能司官俾親賑焉爾等其會議以聞

三十二年十一月

諭戶部朕念切民生時廛宵旰或在宮禁之中或經巡省之地務以編氓疾苦備悉諮詢其從各省來京陛見官員及往來奉使人等亦無不以該省雨澤會否應時田

畝有無收穫竝聞閭資生情形一一體訪比年以來因國家經費尙充遂將各省地丁額賦及舊欠錢糧節次蠲免卽從前未經停徵之漕糧亦逐年免徵總欲使海隅蒼生培固元氣庶臻於家給人足之風今歲畿輔地方雖禾稼未能稔收初意小民糊口之需猶足資給未必生計遂致艱難頃者展謁

山陵沿途察訪民隱見今歲雨水過溢田畝被淹沒者甚多穀耗不登米價翔貴又聞順天河間保定永平四府所屬皆然目前米價旣貴將來春夏之際時值益昂小民必艱粒食此朕目所親觀若來歲錢糧仍然徵收朕

心實有未忍順天河間保定永平四府康熙三十三年應徵地丁銀米著通行蠲免所有歷年舊欠悉與豁免行文該撫曉諭各屬務令人情實惠以副朕子育黎元至意爾部卽遵諭行特諭

三十三年二月

諭內閣據戶部所察霸州等十州縣存貯米五萬七千五百餘石穀八百石天津衛存貯米一萬石穀四萬四千一百餘石此米穀現在倉與否足以賑給與否若足用則以餘米平價糶與百姓可行與否山東漕糧截留數萬石平價糶賣則穀價不騰於民大有裨益今輒至何

州縣平價以糶應截留米若干萬石庫遺戶部司官一員至巡撫郭世隆處令其逐一迅速詳議付彼齎奏

康熙三十四年四月戶部題天津開河工程行文附近州縣派夫定限挑濬

上曰若行文各州縣定限派夫必至苦累民間著停止行文卽發與僱價令天津等處僱民挑濬如此則公事既得告成而窮民亦可資以度日矣

九月

諭戶部直隸順天保定河間永平四府所屬地方今歲水潦傷稼三農歉收朕巡幸所至徧加諮訪聞高阜之產

尙有秋成而卑下之田被潦者多計所收穫不能相敵  
雖經勘災頒賑不致化離失所而須辦錢糧若仍行徵  
取則民力匱乏難以輸將朕心深切不忍著將四府康  
熙三十五年地丁銀米全與蠲免用示寬恤其霸州雄  
縣香河寶坻四處皆有水道可以轉輸每處著發米一  
萬石各差司官一員齎往照彼地時價減值發糶以資  
民食著行文該撫通行曉諭俾均霑實惠副朕軫念災  
黎至意爾部卽遵諭行特諭

四十三年十月

諭戶部今歲直隸地方雨暘應候禾稼有秋各郡民生皆

獲安恆業惟是去歲山東被災之民自冬月以迄春夏  
流離轉徙入順天河間境內者甚多於時設廠煮糜所  
在賑救因而米價至今未減誠恐近畿一路聞井小民  
絀於生計是宜加恩寬恤用宏休養順天河間二府屬  
康熙四十四年應徵地丁銀米著通行蠲免該巡撫卽  
飭府州縣官張示徧諭務俾窮鄉僻壤均霑實惠以副  
朝廷優軫畿輔黎氓至意爾部卽遵諭行特諭

諭大學士等曰曩日夏兒渡等處隄岸常被衝決是以朕  
親臨徧視見楊村原有一引河去海尙近卽欲疏此引  
河建滾水壩水長開閘使河水入海因需餉浩繁又恐

無益故不輕舉朕今遣李光地等往估欲仍開此引河  
大都天津海潮至時一股向王慶坨一股向楊村逆流  
故河水長時卽相觸旁流以致隄岸衝決今將楊村舊  
引河挑濬建壩自必有益再子牙河廣福樓亦有引河  
昔開引河時文安大城百姓謂開河於彼有益而青縣  
等處百姓則稱開河於彼不便互相爭論皆集河干各  
控其情及朕諭以挑此引河不獨便於文安大城而青  
縣亦自無虞民始各退後果兩處皆便矣

五十四年十月

諭戶部朕早夜孜孜軫懷民瘼四方水旱時勤諮詢惟恐

閭閻之蓋藏未裕一遇儉歲收穫失望窮黎卽無以資生也直隸順天保定河間永平宣化五府所屬地方今歲雨水過溢田畝被淹者甚多穀耗不登民艱粒食現今緩徵賑借雖惠澤頻施而來春應辦錢糧若仍行徵取則民力匱乏輸將難繼著將五府州縣康熙五十五年地丁銀八十五萬五千八百兩零糧米豆穀一十一萬五千五百石零草九萬四千九百束零俱通行蠲免爾部行文該督徧飭所屬實心奉行俾窮鄉僻壤均霑朝廷德意倘有不肖官吏私徵侵蝕者察出定行從重治罪爾部卽遵諭行特諭



雍正元年七月

諭倉場侍郎糧運關係國儲必須進行無阻始得及早抵  
通自楊村至通州河道多有淤淺糧船起剝每至耽延  
以致回空陳阻并誤新漕著該督嚴飭坐糧廳查看河  
道有淤淺處作速挑濬深通毋使阻滯並知會天津總  
兵官用心催趕且天津一帶地方向有販賣私鹽等弊  
糧船不許停泊火速趲行直抵通州至抵通後速行起  
卸交倉毋得需索抑勒苦累軍丁朕去年親自閱倉知  
漕糧過壩一晝夜可五萬袋可見交卸甚易爾等加意  
督催務使空船早得回南新漕亦可無誤漕運一事朕

親身閱歷纖悉洞知爾等倘不盡心料理或因勒索致有遲延責無所諉

三年七月二十八日

上諭今歲天津等處地方被水米價甚是騰貴去歲盛京曾由海運糧十萬石著行文將軍綽奇府尹尹泰等將伊等地方糧十萬石由海運至天津新倉俟到日交與地方官收貯將盛京等處倉內收貯舊米每年糶賣易進新米所出舊米若足十萬石卽行運送倘不足十萬石著酌量賤價買足十萬石之數運送今歲收成之處尙未深知不可遽定若果豐收價賤卽行買運若價值

騰貴有不便之處卽令將軍綽奇等將不便之處奏明  
再若有自海運糧之商人不必禁止聽其運至天津貿  
易不許他往著給事中增壽前往再著都察院派漢御  
史一員將此交部轉行將軍綽奇等

八月

諭前於天津蓋造倉廩原備截留漕米是以朕諭托時等  
將湖南湖北之米截留二十萬石存貯天津托時因奏  
天津倉廩地勢卑溼廩底須鋪墊乾草以隔潮氣昨牛  
鈕奏稱墊草亦不免沱爛如此則截留漕米無益前所  
降諭旨截留之米可仍令抵通歸倉當時蓋造倉廩原

係李維鈞及地方官員經手乃並不相度高燥之地草率營建著托時前往天津會同莽鵠立柯喬年詳審地形或另擇高阜之處或將舊基培墊交與李維鈞親同當時經手之員賠補修造卽著莽鵠立柯喬年監督工程至於直隸州縣倉穀李維鈞曾奏虧空無多今歲秋收卽可全補無缺今蔡珽奏稱清苑倉穀並無顆粒清苑爲保定附郭之縣倉穀尙虧空如此則他處可知李維鈞前此所奏不實著大學士會同刑部問明具奏又蔡珽奏稱目下省城米價騰貴今令臬司浦文焯攜帶脚價親至天津將截留漕米星速運三萬石以二萬石

直至省城平糶以一萬石量留沿途被水之處以救眉  
急等語畿輔之地百姓艱食朕心深爲軫念著托時到  
天津將漕米撥三萬石交與浦文焯作速運去今歲近  
京一帶雨水較多恐此米尙不敷用再令陳守勳將通  
倉變色米六成以上者撥十萬石交與余甸蔡起俊動  
用脚價運至天津或平糶或賑濟應運何處聽蔡珽調  
度余甸蔡起俊悉聽蔡珽指揮協助賑恤朕念直隸地  
方低窪之處衆水積而不洩以致但有水之害而無水  
之利疏濬之道不可不講已諭朱軾張燦經理此事聞  
陝西潼商道王全臣在陝挑濬秦渠熟習水利其在軍

前歷年亦著勞績而年羹堯綽奇屢次參奏若非朕保全之伊早罹重罪矣可著王全臣來京其潼商道員缺著松茂道孟以恂調補凡王全臣軍前之事俱交與孟以恂料理王全臣卽著來京不必俟孟以恂交代清楚朕另降旨與孟以恂其松茂道員缺著岳鍾琪揀選題補

九月

諭大學士等前因天津倉廩潮溼不能收貯米石故停止截留今據蔡珽奏稱天津倉廩雖不能貯米可分發各州縣存貯以備賑濟請仍截留二十萬石等語戶部作

速派賢能滿漢司官各一員前往天津會同倉場總督托時將河南小米截留二十萬石一面行文蔡珽令其酌量應貯米之州縣撥派官員於天津地方領運收貯備賑前李維鈞奏請賑濟一月朕思賑濟原不可拘定日期昨降旨修理城工春暖之時小民可藉以餬口但恐三冬未能接濟可行文蔡珽再賑濟三箇月務令小民得所現今遺增壽等前往奉天採買米石運至天津可卽行文伊等於米石之外採買高粱或一萬石或七八萬石一併運至天津於賑濟大有裨益爾等卽遵諭行

十一月

諭大學士等今年直隸州縣被水小民乏食朕軫念殷切除截留漕米發給常平倉穀外又將通倉米六成以上者著托時陳守創親交余甸蔡起俊運赴天津分散賑糶今朕訪得所發之米朽爛不堪其高者不過三四成低者全屬灰土朕軫念災黎宵旰憂勞無時或釋乃托時等全不仰體朕心將此無用之米運給有名無實小民何所資藉此次已運成色米十萬石著賞給各處窮民再另發六成以上米十萬石令托時陳守創余甸蔡起俊運往天津再今歲秋季所發官俸兵糧米色俱不



好嗣後若再如此必從重治罪康熙五十五年曾發通倉米五萬石分貯各州縣備用厯年已久聞俱陳腐甚爲有司之累著從寬豁免

諭滿洲兵丁於技勇武藝俱已精練惟向來未習水師今欲於天津地方設立水師營分撥八旗滿洲前往駐防操演似屬有益其應於何處駐劄設立幾營派兵若干用船若干並如何製造船隻如何演習兵丁之處可會同拉錫朱軾張廷玉蔣廷錫詳議具奏

十二月己巳和碩怡親王等遵

旨議覆天津之海口爲京師重鎮滿洲兵丁令往天津駐

重刊三才圖會 卷一 詔諭 三  
禁學習水師於海防大有裨益其撥兵丁二千名  
之處已經奉有

諭旨官兵駐紮地方亦奉

旨派出大臣前往相度毋庸再議外此所派兵丁令八旗  
滿洲蒙古都統等於各該旗餘丁內挑選每滿洲  
旗分各派二百名設立三佐領蒙古旗分每旗挑  
選五十名設立一佐領立爲左右兩營兵丁習練  
火器爲鳥槍手並設副都統一員令其總管滿洲  
旗分應補佐領防禦驍騎校各三員每翼補協領  
二員蒙古旗分應補佐領防禦驍騎校各一員每

翼補協領各一員再駐防滿洲兵丁應補理事同知一員筆帖式一員其船隻製造大趕繪船十六隻小趕繪船十六隻酌量分配官兵分爲兩班操演其趕繪船各隨小船一隻應令造杉板船三十二隻雇募駕船頭舵水手令兵丁學習熟練從之三年改管理天津水師營副都統爲都統

憲皇帝念津門附近

按禮親王嘯亭雜錄云雍正中

京畿海防綦重因設滿洲水師都統一員副都統一員其協領下若干員兵三千名守禦海口以防鯨濤不測之變然滿兵雖雄健不利水師初設時章程草率所訓練技藝不及陸營之半乾隆丁亥巡幸津甸是日大風海船逆勢難以施演時都統爲奉義侯英俊年既衰老復戎裝繁重所傳令俱

純皇帝

上大怒因裁革焉  
錯誤兵丁技藝既疎隊伍紊亂竟操喧嘩不絕

戶部等衙門遵

旨議准直隸河防水利據和碩怡親王等疏言直隸之衛  
河淀河子牙河永定河皆匯於天津州大直沽入  
海此直隸水道之大畧也衛河與汶河合流東下  
德棣滄景以下春多淺阻一遇伏秋暴漲不免潰  
溢請將滄州南之磚河青縣南之興濟河故道疏  
濬於舊時建閘之處築減水壩以洩衛河之漲靜  
海縣權家口亦築壩減水白塘口入海之處並開  
直河一道使磚河興濟河之委同歸白塘出口修

理海口舊閘以時啟閉則滄縣以北水利興而水患除矣東西二淀跨雄霸等十餘州縣均應疏濬深廣並多開引河使諸淀脈絡相通其已淤爲田畝者四面開渠中穿溝洫庶圩田旱澇有備其趙北苑家二口爲東西二淀咽喉趙北口隄長七里板石橋共八座俱應升高加濶苑家口北之中亭河上流之玉帶河對岸爲十望河均應開通庶東西二淀無衝決之患矣子牙河爲滹漳下流清濁二漳發源山西經廣平正定而滹沱滏陽大陸之水會焉其下流有清河夾河月河皆分子牙之流

同趨於淀宜開決分注以緩子牙河奔放之勢永定河俗名渾河水濁泥多故道遂涇應自柳口引之稍北繞王慶坨之東北入淀兩河淀內之隄至三角淀而止爲衆淀之歸宿應照舊開通逐年疏濬兩河之濁流自不能爲患矣至各處隄防衝潰甚多如高陽河之紫淀口新河南界之古隄新安之雹河均應疏濬修築再請於京東之灤薊天津京南之文霸任邱新雄等處各設營田專官經畫疆理召募老農課導耕種民力不辦者動支正項錢糧代爲經理田熟歲收十分之一以補庫帑

足額而止營田一頃以上者分別獎賞有能出資  
代營者民則優旌官則議敘至各屬官田約數萬  
頃請遣官首先舉行爲農倡率民間田廬有礙水  
道者計畝撥抵視其畝數加十之二三河淀淤地  
必須挖掘者將附近官地照數撥補則營田水利  
人皆趨事樂從矣從之

四年二月

諭戶部去秋北方多雨直隸所屬七十四州縣被水歉收  
朕心深爲軫恤疊沛恩澤加惠窮黎已將七十四州縣  
被災田畝之錢糧照例蠲免其於應徵額賦又復停徵

在案朕思一省之中既有七十餘州縣收成歉薄則必有向鄰封隔縣謀生覓食之人當此青黃不接之時閭閻豈能充裕若仍照舊徵收錢糧民力輸將未免竭蹶用是特頒諭旨施恩於常格之外將雍正四年通省應徵額賦一體停其徵收俾民力寬舒各得用於南畝以副朕勤恤民隱之至意爾部卽遵諭行

八月

諭從來直隸江南兩省盜案多於別省雍正二年三年間李維鈞爲直隸總督節制提鎮遵朕諭旨嚴拏盜賊故直隸盜案因而甚少自去冬以至今春盜案復多若云



因去秋水潦歉收所致何以彼時正當被災乏食之際  
不聞盜賊肆行偷竊至今春夏二麥豐收小民反爲此  
犯法之事是必有爲首積盜糾合匪類巧於漏網各州  
縣被竊之處雖多而奸滑之盜首不過數人窩藏之巢  
穴亦不過數處而已畿輔之地爲四方觀瞻豈可聽宵  
小之潛藏任有司之疎忽昨朕特降諭旨從雍正五年  
爲始凡直隸盜案仍照舊例不分首從皆斬不准寬貸  
蓋除盜安民乃國家政事之要應加懲創李紱職司表  
率安可漠不經心可速飭屬員嚴加緝捕務令得其根  
柢以清盜源若仍前疎忽定將李紱給以重罪並諭直

隸提鎮等官各飭屬員稽查防汛以靖地方毋得疎縱  
自干罪戾在京步軍統領衙門及巡捕營弁五城御史  
及司坊官員各宜盡心訪緝以副詰奸弭盜之職

六年正月

諭雍正二年朕卽諭李維鈞云聞得直隸滄州地方有偷  
鑄私錢之匪類應嚴行查拏李維鈞回奏已經嚴查該  
地方並無私鑄保奏甚力今步軍統領阿齊圖奏稱本  
月內准內務府咨稱番役因公事前往滄州拏獲私鑄  
之回紇劉七等移送前來隨差千總姜進祿帶領番役  
前往滄州將私鑄之夥黨悉行拏獲並獲鑄錢器皿等

語觀此則滄州奸民私鑄之弊由來已久而地方大吏漫無覺察今始敗露阿齊圖差官將匪類夥黨俱卽捕獲不使漏網甚屬可嘉著將阿齊圖及所差官弁交部議敘番役著加賞資其私鑄一千人犯交刑部嚴審定擬具奏夫私鑄錢文大干法紀且私鑄不息則錢法不能畫一而銷燬制錢等弊皆由此而生何以便民聞之用此事大有關係畿輔近地尙有此等奸民則各省遠方難保必無此弊著通行曉諭再嚴加申飭倘直省督撫中如有似此疎縱不肯實力查拏者朕留心訪察密差京員緝捕若一經察出必將該督撫照溺職例處分

九年四月

諭內閣聞天津一帶民間漁船專以販魚爲業每年穀雨以後芒種以前是其捕取之時亦猶三農之望秋成也若此時稍有耽誤則有妨一年之生計矣目今天津運往山東積儲米糧皆僱覓漁舟裝載然亦當聽小民之情願勿以濟山東百姓之儲而妨直隸民生之計著直隸總督天津總兵官速飭辦理糧務人員就近酌量此時不可強僱漁船致令失業此係積儲備用之米石俟過芒種以後運送亦未爲遲其速將朕諭徧行傳知

丙辰吏部議覆署直隸總督唐執玉奏天津直隸

州係水陸通衢五方雜處事務繁多辦理不易請  
升州爲府設知府一糧捕通判一經歷一教授一  
訓導一附郭置天津縣設知縣一縣丞一典史一  
改州學正爲教諭此新設一縣同該州原轄之青  
縣靜海及滄州南皮鹽山慶雲一州三縣統歸新  
升之府轄其舊設之河間府海防同知應就近改  
屬天津天津舊設之州同吏目應裁霸昌道屬之  
寶坻縣廣袤六百餘里其毘連之梁城所距寶邑  
甚遠一切公務該縣不能兼顧請將寶坻縣之江  
窪口起至西頭莊止南路一帶割歸梁城並改所

爲縣設知縣一典史一教諭一訓導一舊設所千  
總一應裁從之尋定天津新升府曰天津梁城所  
改縣曰甯河

十一年四月

諭刑部向來直隸盜案往往多於他省朕以畿輔重地理  
宜倍加清肅乃宵小肆行如此不得不嚴加懲創以示  
儆戒是以預先屢次曉諭然後定例於雍正八年爲始  
將盜夥不分首從皆行正法此朕辟以止辟不得已之  
苦心也近年以來直隸盜案較前減少是小人頗知畏  
法朕仍可遵奉

皇考法外施仁之意從寬辦理矣著將直隸盜案仿照各省分別法無可貸情有可原定擬具奏倘姦民玩法日後盜案復多朕必仍照不分首從皆斬之例行若各省盜案有加多於平日者亦照不分首從之例行著各該督撫地方有司通行曉諭務使遠鄉僻壤之民共知之

乾隆三年八月二十七日

上諭今年直隸各州縣收成豐歉不一米價未免稍昂而奉天山東二處年歲俱獲豐收從來鄰近省分必須商賈來通以豐濟歉則需穀者既得以餬口而糶販者又藉以營生殊屬兩便之道但奉天山東俱屬海濱地方

官吏因有禁米出洋之例未肯任從民便用是特頒諭旨奉天山東沿海地方商賈有願從內洋販米至直隸糶賣者文武大員毋得禁止但商賈米船放行之時該地方官給與印票仍行文知照直隸總督其沿途巡海官弁亦時加查驗毋令私出外洋米船既抵天津卸米之後直隸地方官給與回照仍行文知照奉天山東兩省俾米穀流通以副朕軫恤民瘼一視同仁之意該部卽行文奉天將軍府尹山東巡撫知之

四年五月

上諭上年直隸米糧騰貴曾降諭旨使商賈等將奉天米



石由海洋販運以濟畿輔民食以上年爲期今弛禁之期已滿而京師雨澤未降恐將來民間不無需米之處聞奉天今歲收成頗稔著再寬一年之禁商賈等有願從海運者聽其自便可行文直隸總督奉天將軍等知之

十月二十日

上諭乾隆三年直隸地方歉收米價昂貴朕降旨准商賈等將奉天米石由海洋販運畿輔米價得以漸減今年四月間以弛禁一年之期將滿而直隸尙在需米之際天津等處價值未平又降旨寬限一年民頗稱便朕思

奉天乃根本之地積貯蓋藏固屬緊要若彼地米穀有  
餘聽商賈海運以接濟京畿亦良多益竄之道於民食  
甚有裨益嗣後奉天海洋運米赴天津等處之商船聽  
其流通不必禁止若遇奉天收成平常米糧不足之年  
該將軍奏聞請旨再申禁約

十一年戊寅工部議覆前准直隸河道總督高斌  
奏直屬水利工程應乘春融興舉各事宜一天津  
塌河淀之東有舊河形一道至甯河縣七里海長  
三十餘里七里海之東亦有河形一道長十九里  
餘直達薊運河應一併開挖引流歸海一津城東

北一帶漚水由高家觜經宜興浦燕家口賈家口入於海河年久淤塞請就舊有河形開挖一靜海縣蘆北口一帶地勢低窪雨多苦潦土性斥鹵乾旱又苦無水請於蘆北口接挑河渠庶村莊漚水俱有去路一南運河捷地汛宜改挑引河以免減壩分溜過多之患得

旨依議速行

戊戌工部議覆協辦大學士署直隸河道總督劉於義等奏續勘慶雲鹽山二縣疏濬事宜一慶雲縣漚水俱賴馬頰河宣洩應與山東樂陵海豐等

縣交界之處並大巨河入海河道開挖寬深一慶雲縣城北應從趙魁斗莊經高橋賈家莊白廟海子王家窪王可莊等處開渠一道引水入老黃河以爲歸宿並於窪口築高添設涵洞二以防黃河倒灌一慶雲縣高慕臺窪應照舊挑挖深通引水入老黃河以消積潦一慶雲縣四鄉民溝十六處前經勸民開挖疏通今紀家鋪北等七溝見在深通無庸挑挖外其後馬家莊等溝九處或照前開挖或應接長開挖分別引水入老黃河亭子河及無棣溝等處均應照議開挖並應建設木橋二以

便行旅一鹽山縣宣惠河前經挑濬但河身尙淺  
應再挑深務期通縣漚水悉歸老黃河至東省海  
豐縣應挑河道俱令鹽山縣督率一律挑濬一鹽  
山縣東之明泊窪西北諸水俱匯於此無路宣洩  
窪內地五百餘頃每致淹沒應挑洩水河一道由  
釣魚臺程村橋起通至宣惠河俾歸老黃河並將  
程村橋一律修整從之

十九年十一月

上諭長蘆鹽政普福奏蘆東衆商情願捐銀三十萬兩稍  
充軍營賞需之用且援金川之例爲請此甚非是金川

用兵適當朕普免天下錢糧數千餘萬之後又值江南水災賑濟撫恤需用過多是以兩淮蘆東浙閩等處各商之急公捐輸者不便阻其報効之忱俯允所請其實於軍需所費何裨萬一方國家全盛府庫充實適當準夷報誠者接踵而至應籌其遊牧俾令久安且彼自亂機有可乘此不過以餘力舉之已屬裕如而近年以來各省年穀順成倉儲豐羨卽去秋淮徐諸郡被水成災賑恤所需亦不下數百萬而每歲冬季八旗兵丁諸賞賚按例舉行並不因西北軍需於應用帑項稍存裁節之見統計經費仍復有盈無縮何至遽以商捐爲請耶

向來偶遇軍興災賑之事不知輕重之人多思藉以開  
例報効然果使籌餉報荒動項經畫則捐輸踴躍原屬  
臣民忠愛之誠而此時則殊可不必況天地生財貴於  
流通庫藏所積既多而臨時又復別籌取益殊非用財  
大道朕所不爲軍需所費邊境資以流通郡內商民亦  
均爲有益普福此見甚小著傳旨申飭恐各省復有踵  
而行之者是用明降此旨諄切曉諭令內外諸臣共知  
朕意

二十七年八月

諭今年直隸夏雨成澇濱水窪地田禾不無淹損所有積

年錢糧帶徵緩徵各屬內今年復被水災之文安大城武清寶坻薊州天津及霸州保定永清東安安州新安青縣靜海滄州甯晉津軍廳十七州縣廳民力自屬拮据其應徵銀八萬二千四百兩零穀豆高粱五千四百石零均予豁免以示優恤至與災重州縣毘連本處復被水災之甯河固安鹽山慶雲衡水五縣所有應徵銀二萬一千五百餘兩穀豆高粱一百八十餘石亦著一體蠲免該督其嚴飭所屬實力奉行務使窮民均霑實惠毋致吏胥中飽副朕加惠黎民至意該部遵諭速行

二十八年二月



論畿輔一帶去年秋霖過多窪下之區現在設法疏消以利東作因思河海爲積水委輸之尾閘而地方官或拘於成例僅將五閘宣洩不肯推廣籌辦多開壩口以爲釜底抽薪善策著協辦大學士公兆惠卽速馳驛前往帶同鹽政達色知府周元理悉心確勘情形有應行增開之口卽一面奏聞一面辦理務期去路疏暢水消之後補築門口卽不無所費而民力實多不必稍爲瞻顧也

三月

諭去秋直屬瀕水窪下之區因秋霖積潦猝難消涸恐誤

閭閻東作屢諭方觀承令其乘時設法疏導以重農功該督初奏一俟春融再行相度經理繼復以海不受水爲詞俱於摺內批諭毋得稍事因循致誤地方受累然猶以方觀承身任總督情形自所熟諳且當兩年秋雨過多沮洳之壤未易一蹴施工兼以辦賑殷繁亦難以分身兼顧是以御史永安顧光旭等先後具摺條奏朕尙以伊等身居局外坐言易而起行難設令伊等與方觀承易地而處亦未必能剋期集事轉不無曲諒該督俾肩其責者無掣肘之慮此朕本意也嗣據該督具奏文安大城等處疏濬事宜築隄車戽從事旣苦拮据奏

功殊難迅速卽令永安顧光旭並添派御史二員前往  
勘辦及至詢問接駕諸臣以天津海口不應專恃五閘  
宣導以致停淤不暢而鹽政達色亦僅圓融其辭以多  
增數口想係有益無損爲對朕知此事非特遣大員不  
足以收實效因命兆惠馳往相度將各處溝閘開放寬  
通不過數日之間閘口水落數寸而內地已涸出二十  
餘里靜海等窪地亦涸出十分之六是豈海之受水道  
當兆惠到彼時耶可見事在人爲前此該督辦理遲誤  
之愆更無由置喙矣在直屬兩年被潦成災較重爲大  
吏者經營補苴倍當竭蹶朕委任封疆雖細事必加體

恤從不肯以歲時水旱之偏諉過督撫則爲督撫者何所顧慮而不爲民請命耶方觀承如果不存護短之見悉心早爲籌議具奏朕或指示規畫或派員伙助何所不可顧乃一切模稜不惜曠時玩事若此朕安用此督撫爲耶昨有旨已將方觀承交部察議今細覈見在積水消涸情形非按例察議所能示儆所有督理之方觀承及布政使觀音保並天津等各屬俱著交部議處以爲玩視民瘼者戒至天津道那親阿霸昌道額爾登布天津府知府額爾登額俱專駐該處之方面大員率屬親民尤爲切近及早將一切疏洩事宜據實稟請督臣

籌辦如言之不聽不但可以直揭部科卽用摺據實密  
奏朕心深爲獎予况朕於道府召對期望造就初不以  
有司之職待之中外誰不共曉那親阿等以滿洲世僕  
在部院中尙能曉事是以擢用外任俾知實心報効乃  
湔染外吏惡習一味仰承風旨於地方重務視同膜外  
若不重治其罪何以示各省道府之戒那親阿額爾登  
布額爾登額俱著革職發往巴里坤自備資斧効力贖  
罪夫以直隸近在畿輔而道府之承順總督畏首畏尾  
情狀若此又何論於各省乎嗣後直省監司郡守等員  
不知儆省有仍蹈此轍者朕必按此例嚴處直屬水利

俟裘日修到日會同通行勘辦外見在天津文安大城等屬積水減退情形並各處隄閘工程仍著兆惠同方觀承卽速馳往審度經理副朕軫念元元至意

諭前因天津文安等處積水停淤該地方官不能及時疏洩致誤春耕是以降旨將天津道那親阿霸昌道額爾登布天津府知府額爾登額一併革職發往巴里坤効力贖罪以爲玩視民瘼者戒在該員等貽誤地方咎皆自取但覈其致罪之由微有不同若不量爲區別轉無以儆職守而示創懲那親阿駐紮天津積水情形日所目擊乃竟漠不關心聽其淤遏實屬罪無可追額爾登

布於所屬疏消事宜固多延緩然尙有查勘災賑事務一時或難兼顧知府額爾登額雖未能早爲籌辦但河務究非其專責並較那親阿情稍可原額爾登布額爾登額俱著加恩發往甘肅交與總督楊應琚差遣試看額爾登布以同知委用額爾登額以知縣委用俾各勉自勵以觀後效

### 三十二年三月

諭朕此次巡幸天津閱視淀河隄閘按圖披覽內有千里長隄之三灘里起至格淀隄莊兒頭止中間並無隄岸詢之該督稱向來未經辦理每遇淀水長發地畝民居

無不淹浸殊堪軫念本日朕閱看子牙河特命阿里衮分道往勘據稱無隄處所東西約長十餘里其中間有民修隄埝被水衝缺數處每當雨水過多之年村民一二千戶地畝千餘頃常被水患村民見有欽差前往踏勘築隄無不歡欣踴躍僉云從此子子孫孫皆可永遠霑恩且隄內之地亦可盡成膏腴實於居民有益等語從前修築格淀隄原爲捍衛村民今三灘里至莊兒頭十餘里獨無隄岸以資保障村民未免向隅著交與方觀承再行詳悉相度接築長隄卽覈實估計妥議具奏

三十二年三月



諭朕巡幸天津閱視海河隄淀以期利賴民生啟鑒之前  
已降旨將天津府屬本年應徵錢糧蠲免十分之三  
茲翠華臨蒞小民扶老攜幼歡迎道左愛戴之忱倍切  
朕心深爲喜悅著再加恩將天津府屬節年尾欠及上  
年勘不成災緩徵銀七萬三千二百餘兩屯穀三千四  
百餘石又節年因災出借舊欠及上年被水出借穀十  
三萬一千一百餘石普行蠲免俾海濱部屋益慶盈甯  
共安樂利以示省方施惠之意該部卽遵諭行

諭朕此次臨幸天津該商等趨事辦公頗稱踴躍因念長  
蘆通綱引課每年十月內奏銷正值銷售菜鹽之時鹽

重刊元澤月示 卷一 記論 三  
價未及收齊而奏限已屆商力未能舒展著將長蘆通  
綱鹽課嗣後改至十一月底奏銷俾得從容完納以示  
體恤

諭朕此次巡行河淀閱視隄防今由運河回鑾經臨筐兒  
港察看減河形勢見壩身出水處高於河底七尺則遇  
汛漲時所減之水下注過猛易致跌落成坑排椿不無  
撼動自應於石工之外接築灰工十五丈使坦坡漸平  
以導其勢至王家務捷地興濟三處減河皆所以宣洩  
盛漲保衛隄工別由一路入海不使三岔河之水滙積  
尤爲畿南水利攸關亦宜一律疏濬流淤期於深通易

達再子牙河故道自谷家莊以下至吳家溝一帶河身  
窄狹並應普律展寬用消滙水以衛民田所有各處工  
程著該督方觀承按工覈實估計奏聞動帑興修務使  
疏洩得宜俾河務民生永資利賴副朕省方疇咨至意

三十三年庚寅

諭朕巡幸天津周覽河隄淀閘指示機宜永求畿輔民生  
利賴翠華臨莅宜沛恩施所有經過地方及天津閘府  
所屬本年應徵錢糧著加恩蠲免十分之三以昭乘春  
布澤之意

三十六年二月

諭軍機大臣等今日御舟過興濟牐閘視大概情形似宜  
僅用減水石牐不應更立牐座該處河道本屬深通當  
春令水發之時底水猶然寬裕以朕所御安福艦而計  
船身受水約三尺餘浮送尙屬便利則江廣重運糧艘  
儘足遄行無礙毋庸更資牐座節省常時旣不藉其利  
而一遇運河漲盛牐口窄小難容又有金剛牆攔阻不  
能立時宣洩致易漫溢爲虞若拆去牐牆改爲減水石  
牐使河流隨時暢瀉自爲因地制宜之道且牐底見在  
高出河面約五六尺若俟漲滿平底方令減網其勢已  
遲或將舊有牐底若低數尺改爲滾壩坦坡以次漸落

並將下游引河及歧口入海處所逐層疏導俾成建瓴之勢無稍壅滯則較此特長水三尺即可隨時由壩滾消無慮積久而溢而出口水誌比今尙餘三尺並無慮重運之或致膠舟此工庶不致虛設昨楊廷璋因去夏雨水過多運河漫溢淹浸田廬而興濟以下更無減水之處議於天津城西芥園左近添設減水壩一座以洩盛漲朕昨親臨相度尙覺其地距津城太近不能經久無弊因諭周元理詳悉勘度形勢於上流另擇妥善之地俟朕回鑾再行閱定今思此處若果宣洩得力其上復有捷地廬或並照此一律妥辦運河又有此兩壩減

水暢利雖遇漲潦不致全注下游則楊廷璋所議芥園壩工卽不再添似亦無礙卽如從前南巡時閱視清口情形因定五壩過水尺寸令河臣每歲或按水誌展折清口以洩洪湖之漲自後下河遂無潦患頻年有收較之前人斤斤於車邏諸壩之節宣不啻事半功倍此非釜底抽薪之一明效大驗乎但河務關係重大朕經行一覽亦未能自信爲必屬可行周元理在直隸甚久河防事宜素皆留心而楊廷璋亦當折衷以總其成但恐伊等面承朕旨或不敢復抒己見非所以集思廣益也因思裘曰修向日曾命閱過河工尙屬諳悉河務著前

往滄州一帶會同楊廷璋周元理將運河上下情形及  
引河歸宿之處逐一履勘悉心籌度據實詳悉妥議具  
奏楊廷璋等尙須至山東境上送駕喪日修奉到此旨  
亦未必如馳驛之迅速須按程而行約計楊廷璋等回  
至滄州適與相會尙可從容妥辦不必赴山東行在復  
命俟回鑾至直隸面候閱定再爲指示所有御製興濟  
牘及芥園壩工二詩並著抄寄閱看

諭上年夏間天津等處因雨水過多被災較重業經疊降  
諭旨動發銀米蠲賑頻施黎民幸無失所第念長蘆鹽  
坨同時亦被淹浸該商等工本不無稍虧旣仍照常納

課又不能與貧民一體沾恩未免向隅今羣華臨莅深  
悉該處情形且諮訪錢價較前更爲平減雖去歲增加  
鹽價現在商力仍覺拮据著加恩每斤再暫加錢一文  
以降旨之日爲始定限一年仍照舊值行銷俾資充裕  
以副朕因災恤商之意該部卽遵諭行

諭朕恭奉

安輿巡幸山東連日經行畿輔童叟歡迎足徵愛戴因念  
去歲夏間天津等處雨水甚多被災較重雖經疊降諭  
旨蠲賑頻加所見茅簷景象頗爲恬適第災歉之餘元  
氣未能驟復自宜再沛恩施期臻康阜所有天津府屬



乾隆三十三年以前地糧倉穀各民欠已於上年豁免  
著再將滄州青縣靜海鹽山慶雲五州縣三十四年因  
災借欠穀三萬八千六百餘石及天津縣三十四年常  
借未完穀三千六百九十餘石概行蠲免至經由之東  
安交河景州東光四州縣所有未完二十二年至三十  
四年因災借欠穀三萬八千三百餘石及災重加賑之  
寶坻甯河永清霸州薊州五州縣未完二十五年至三  
十四年因災借欠穀一萬八千七百餘石亦著全行蠲  
免其順天府屬之武清一縣被災尤重該縣向無積欠  
未能一體沾恩前已降旨將經過各州縣蠲免本年地

丁十分之三著加恩將武清一縣蠲免十分之五用均  
愷澤俾閭閻共資樂利以副朕行慶宣恩之至意該部  
卽遵諭行

九月

諭直隸今秋被水各屬屢經降旨據實查勘分別賑恤其  
低窪地畝被淹者自應早令涸出俾得趕種秋麥以資  
口食茲詢楊廷璋據稱已報涸出者計四十五州縣業  
經借給麥種現在麥苗俱已出土青蔥惟宛平文安大  
城保定永清東安武清霸州通州香河寶坻甯河天津  
任邱豐潤十五州縣地更低窪者尙未全涸已委員協

同疏洩其東安香河寶坻豐潤四縣亦續報漸次涸出  
仍飭令上緊疏消等語此等低窪地畝去歲曾經遇水  
今年又復被淹若積潦不能速消民業徒成廢棄而濱  
河之地多係一禾一麥如能及時涸出種麥可望倍豐  
於貧民生計甚爲有益但恐該地方官不能實心經理  
必致玩日妨農朕心深爲廕念著派袁守侗德成分往  
各處督率該州縣卽速設法疏消務令及早涸出無誤  
布種春麥尙書裘日修於近京水利情形較爲諳悉且  
此被水之處順天所屬者居多著派其往來調度董察  
總司其事伊等於奉到諭旨後不必赴行在請訓卽速

起程前往俟各處辦有頭緒再行回京覆奏

三十七年九月

諭軍機大臣等周元理奏請明春恭奉

皇太后安輿巡幸津淀一摺朕尙未奏聞

皇太后准行與否未能卽定周元理且候旨辦理已於摺內批示矣至淀河一帶沿岸點綴段落上次巡幸時地方官踵事增華不免過於繁縟因是年適屆朕六十慶辰次年卽恭逢

聖母八旬萬壽臣工效祝抒誠通下情而奉

慈歡於理尙可不禁若明春閱視河工由淀河臨幸天津

專爲民生利病與適屆

慶典之年不同斷不可以復滋繁費卽蒙

懿旨俞允

鳳舸經行水鄉風景清嘉亦足以仰承

慈豫何藉彼靡文虛飾徒耗物力而適形鄙俗乎昨已面諭楊景素令其轉告周元理恪遵朕旨倘周元理不知仰體朕心妄有綴設朕覽之非惟不喜且必加以飭責周元理慎毋視爲文告空言卽各處行宮糊裱一節明春距上次巡幸不過兩年頂棚窗扇俱係向時所辦斷不致於破損祇須視其滲漏處所略加修補其餘切不

重刊天津府志 卷一 詔諭  
可一律見新將一併明晰傳諭周元理知之

三十八年三月

諭朕因永定北運兩河工程告蒞莅省成事臨幸天津直  
省士子夾道歡迎輸誠蹈詠進獻詩冊者甚多爰照從  
前巡幸江浙山東之例命題考試就其文高下量加錄  
取所有列在一等之生員顧堃李廷敬貢生閔思懋陸  
伯琨俱著賞給舉人其舉人杜兆基著以內閣中書補  
用其列在二等之進士張虎拜舉人張方理秦樛邱桂  
芬謝肇洞吳裕德祝堃生員陸蓉邱桂山劉祖志貢監  
生邱人龍楊炤李憲喬趙珍俱著賞給二足以示省方

觀風嘉惠譽髦之至意

五十二年十一月

諭軍機大臣等朕明春臨幸天津巡視海淀向來直隸淀河一帶豫備綵棚戲臺並設有採蓮船隻等件徒滋糜費殊屬無謂著傳諭劉峩此次臨幸天津經過地方於此等無益之費概不必豫備至天津商人等情殷愛戴於朕臨幸處所向或偶有點綴雖不便概行禁止但不可過事浮靡致多繁費並著穆騰額諭令該商等務宜仰體朕意止須照常豫備毋得侈爲觀美以副朕崇實黜華之至意

五十九年三月

諭朕此次臨莅津淀原爲當令時巡省方問俗並非爲遊玩適情屢經降旨諭令該督等毋許於沿途備辦排當點綴等件以致無益妄費乃本日駐劄楊芬港地方該督尙備有龍舟及戲劇雜伎踵事增華徒滋糜費殊非仰體朕問民疾苦黜華崇實之意本應將該督等治以應得之罪但念伊等職司地方因朕翠華臨幸藉以抒忱効愷亦屬出於愛戴之心姑從寬免其究處已將龍舟等件概行屏除外至此項費用雖據該督等奏係捐廉辦理第恐地方官吏有藉詞累及閭閻情事著於長



蘆應解內務府款項內賞給銀三萬以爲楊芬港豫備  
龍舟及各項點綴之用該督等宜益知感愧毋任屬員  
等絲毫派累以副朕屏絕浮華省方施惠至意

嘉慶五年戊午

諭戶部議覆長蘆鹽政觀豫奏請蘆東鹽斤加價一摺所  
駁甚是已依議行矣見在軍務尙未蒞事一切兵餉供  
支皆須發帑接濟固應寬爲籌備但朕斷不肯因此有  
累及閭閻之事教匪何民也原因不肖官吏勒索苦剋  
激成此事至今未能復業自滋事以來到處焚掠裹脅  
百姓偪於飢困不得已而從賊是欲剗平賊匪必先使

吾民各安生業民安而賊自可平多安一民卽少一賊  
此事理之必然者若因軍興需費浩繁遂思朘削百姓  
之脂膏冀補國家之帑項或致生計不足別滋事端卽  
言利則所費豈不更多爲害更大朕躬行節儉永杜貢  
獻言利之徒無所施其伎倆惟近日臣工往往藉軍需  
爲名在朕前嘗試巧言利國實皆利己此等假公濟私  
之人本應加之譴責但人材不易豈遂以一眚遽斥此  
時亦第存之於心不肯宣露早已薄其爲人矣卽如長  
蘆加增一事雖計算食鹽之人每日所費不過一二文  
似屬有限而不知鹽斤爲食用所必需一經議增則人

人均受其累且私販本因官鹽價昂而起今再議增加則私鹽自必更爲充斥官引墮銷愈多長蘆鹽價加增已非一次卽該商積欠各款節經寬免展限者亦非一次恩施不爲不厚豈得復行干瀆爲此無厭之求况鹽價旣增之後卽不能復減累民甯有已時雖據觀豫奏稱此次加價爲清完積欠而設但加價之後該商等亦未必能清完國課徒然病民以裕商更屬不值朕甯可使帑項有稽而斷不肯賡民以益帑况天下山陬海澨所有財貨皆朕之財貨豈必聚於宮府踵瓊林大盈之鄙識哉爲天子者富有四海不問有無藏富於民周流

泉幣斯得九五福二曰富之旨矣昨兩淮浙江廣東各商俱籲懇報効而長蘆商人並未呈請出貲助餉更無可藉口今若允該商等所求致兩淮等處亦復效尤紛紛懇請加價更無所底止矣朕勤求上理惟思克己利民以符損上益下之義將來軍務完竣卽見開捐例亦當停止豈有無故將鹽價加增之理乎觀豫此摺雖未必爲牟利私已起見但率聽商人慫恿遽行瀆請實屬不合觀豫著飭行將朕此旨與諸王及大學士九卿同看卽行覆奏

六年六月

諭內閣前因京師雨水甚大永定河決口漫溢下注附近  
京城西南各州縣地方自必被水其東北一帶積水未  
能卽時消耗民舍田禾必多淹浸之處朕心深爲廕念  
誠恐地方官查報不實特派台費蔭等八員分赴四路  
悉心查勘嗣又思被災民人嗷嗷待哺刻不能緩若俟  
該員等查奏到時再行撫恤未免稽遲復經降旨傳諭  
台費蔭等查看被水地方有急須散賑之處卽督同地  
方官立時賑濟一面奏聞一面動帑開倉原欲使被難  
窮黎早得賑濟藉以存活伊等自當仰體朕如傷在抱  
之意妥速查辦乃各路卿員內惟派往南路之台費蔭

陳震蔚所辦實爲妥協伊二人本在霸州文安分路給賑聞保定縣被災較重卽馳赴該處督飭該縣銀米兼放急爲撫恤俾災黎等得以立時果腹其查勘西路之窩星額廣興僅查至涿州卽行回京不過開寫戶口清單具奏並未將如何賑濟之處悉心經理至派往東路查勘之阿隆阿張端誠旣目擊武清甯河寶坻被災較重而甯河村莊俱被水圍浸又曾接到續降之旨並不督同地方官立時開倉賑濟經朕面詢轉稱民間藉有新麥舊穀餬口此時不必賑濟大屬非是卽如京師大宛兩縣本年麥收非不豐稔早經降旨給賑且各村莊

猝被水災廬舍俱遭淹浸卽有收藏麥石甯不被水漂  
失而阿隆阿張端誠在朕前尙以爲該處百姓有新麥  
足資接濟是何言耶且朕念天津地處下游永定河漫  
水匯流灌注殊深懸廬於十七日降旨令伊二人東路  
查勘事竣卽前赴天津察看水勢乃本日伊等面奏在  
河西務地方業經接奉此旨並不就近速往天津轉至  
京城復命請訓其意不過欲藉此回家看視耳朕軫念  
民依特遣卿員分路查勘以期速拯災黎今各路辦理  
既有不同自當覈其功過明示勸懲台費蔭陳震蔚著  
交部議敘爲星額廣興著交部議處阿隆阿張端誠著

交部嚴加議處仍令伊二人卽赴天津查勘該處被水情形不准歸家亦不准馳驛前往至查勘北路之恩普范鑒因各該處地勢較高居民等未經被水無須開倉給賑是以來京復命若果有應賑災區亦必能遵旨辦理伊二人無咎無譽現在五城設廠煮賑都察院堂官本有稽查之責但念西城馮光熊見已年老照料恐有未周卽著在本衙門辦事不必前赴飯廠所有監放五城煮賑事宜著派恩普范鑒會同舒聘及前次派出之窩星額廣興輪流查察務使窮民得沾實惠

十二月



諭內閣向來各省被災州縣除大賑之外每有於次年新正加恩展賑者本年直隸省被災較重貧民望澤尤殷昨經降旨令陳大文體察情形據實速奏茲據陳大文奏到查明被災九分十分之順天府屬大興宛平等六十州縣明歲青黃不接時應需接濟等語朕軫念民艱刻深廑繫若照例於明正始頒發恩旨未免稍緩且此時辦理展賑若將九分十分災之極貧加賑一月兩月其餘亦不能普被所有順天府屬之大興宛平通州武清寶坻香河甯河霸州保定文安大城固安永清東安涿州房山良鄉順義保定府屬之清苑安肅新城博野

雄縣蠡縣容城東鹿安州新安河間府屬之河間獻縣  
肅甯任邱交河景州東光天津府屬之天津青縣靜海  
正定府屬之正定藁城無極阜平新樂平山遵化州屬  
之豐潤玉田冀州武邑衡水新河趙州柏鄉隆平甯晉  
深州武強饒陽安平定州深澤等六十州縣俱著加恩  
於明歲正月起至四月麥收時止各按地方村莊多寡  
遠近多設粥廠無論極次貧民一律給賑以示軫恤災  
黎恩施普徧至意此外原報六七八分災之州縣如有  
應行煮賑接濟之處並著陳大文詳細查明再行具奏  
至此次煮賑銀兩卽著將應行解京之旗租銀二十餘

萬兩賞給備用

十二年三月

諭內閣據溫承惠等奏本月十二日酉刻天津地方西北風大作猛烈異常達旦方息剝船民船多有槓撞損傷淹斃船戶水手三百餘名楊村備剝船二百隻內僅存尙堪修艖起剝者五十二隻其餘不堪收拾及漂淌無存者計一百四十八隻現在剝運緊要已飭雇覓民船俾資起剝等語此次暴風徹夜本屬狂猛官民船隻猝不及防以致槓撞沉溺淹斃多命深堪憫惻除現經地方官捐資棺殮撫恤外著加恩卽於天津運庫動項無

論大小每名口加賞銀三兩以示軫恤其沿河一帶州縣既據奏稱現委道員沈長春前往確查有無遭風船隻淹斃人口報明辦理著俟查明據實奏請施恩毋稍諱飾損壞剝船並非駕駛不慎所致著免其賠補卽飭將堪用船五十二隻動項修整應用毋誤剝運至添雇民船務核明需用實數查上年議定章程妥爲雇備毋得縱容吏胥藉端封拏多船訛索賣放及船戶承攬包庇等弊

十月

諭軍機大臣等賈允升奏請挑濬減河以利漕運一摺所

奏甚是直隸天津池南舊有減河四道每遇運河水勢  
盛漲藉資宣洩設運河水勢微弱並可儲蓄挹注前人  
立法之意實爲盡善自應挑濬通暢以復舊規若任其  
日久淤墊不惟漕艘來往恐有阻滯於南北行旅亦多  
未便卽如本年臨清捫口五十餘日祇因衡水無從分  
洩以致幫船稽阻不得已開決四女寺河隄而宣洩過  
急民閒田廬閒被淹浸此其明證也事關兩省水利著  
溫承惠吉綸派委明幹大員詳細履勘其如何挑挖興  
工之處務須會籌妥辦以期疏治深通切勿意存惜費  
省費轉多矣其河身閒有高仰露灘處所並當嚴禁居

民勿許占種禾麥致與正河有礙

十三年三月

諭內閣畿輔爲首善之區人文漸被多士蔚興茲因循覽河隄巡幸淀津業已恩施黎庶而觀風所莅並宜嘉惠士林用廣黌序所有直隸通省本年入學大學增額五名中學增額四名小學增額三名該學政悉心甄錄務拔其尤以副朕樂育人材之至意

諭內閣溫承惠奏查勘滏陽河淤阻情形請挑挖水占糧地以資行運一摺滏陽河係直隸運鹽要道向由甯晉之黃兒營一帶與滹水合流至天津入海今旣據溫承

惠委員查勘黃兒營一帶因滹水泛漲日久淤高難以挑復自應另籌運道以利民生著卽照該督所請將現在水占之耿家莊等處分段挑挖成河俾商艘民船不致阻滯其所需工料銀三萬九千八百二十餘兩亦著照所請知會長蘆鹽政於本年秋後將商捐銀兩照數撥發選派幹員帶同誠實商人赴工挑挖一切夫料工價俱由商人自行經手仍著該督派委道府大員駐工督率其河身所占地畝應納錢糧俟造冊具題加恩豁免

諭朕此次巡幸天津閱視河隄各工業於啟鑾日降旨將

經過地方及天津閩府屬本年應徵錢糧蠲免十分之三茲翠華臨莅閩閩氣象恬熙小民扶老攜幼趨迎載道歡欣愛戴出於至誠朕心實爲嘉悅允宜特頒慶澤用慰就瞻著加恩將經由各州縣嘉慶十一年以前積欠地糧正耗銀六萬八千餘兩糧七百餘石並天津閩府屬嘉慶十一年以前積欠地糧正耗銀七萬四千餘兩糧九千三百餘石全行豁免俾蹕路所經及海濱葭屋咸慶盈甯以示省方觀民行慶施惠至意該部卽遵諭行

諭朕此次巡幸淀津現經降旨將沿途經過地方及天津



閩府屬十一年以前積欠錢糧概行豁免以敷閩澤因  
思輦輅未經之處小民跂望孔殷自宜廣沛恩膏期間  
閩共沾實惠著再加恩將嘉慶十一年以前直隸通省  
州縣積欠地糧正耗等項蠲免十分之二俾郊圻億兆  
咸安樂利以示展義省方加惠無已至意該部卽遵諭  
行

諭朕此次巡莅天津慶澤覃敷俾羣黎咸沾惠愷因思情  
理庶獄予以自新亦恩施所宜逮所有直隸省軍流以  
下人犯著該督飭屬查覈案情分別減等發落以示矜  
恤

上諭天津行宮恭貯

純皇帝墨寶朕閱視辛卯年御筆三十五六年顏色如新  
收藏妥協甚屬恭敬所有

純皇帝墨寶並朕御筆均應如此敬謹恭貯以昭慎重至  
陳設玉玩鋪墊等項此次各商既已捐辦所費不貲可  
嚴諭承辦商人逐一造冊入於交代以備查考六七年  
後再遇巡幸毋庸籌款另行備辦此卽朕恤商之本意  
也至柳墅行宮御舟均係各商捐修承辦卽應籌立款  
項按年歲修以免巡幸時大修糜費其御舟御筆陳設  
鋪墊亦應一體辦理

按長蘆鹽法志載

柳墅行宮在天津城南門外海河東沿河牌樓外宮門西宮內宮殿南嚮乾隆三十年長蘆通綱商人呈請購材恭建豫備

巡幸駐蹕之所由巡鹽御史高誠奏准衆商公捐公辦又

皇船塢在天津開口三里大園

御用龍舟貯於此塢內房屋六十七間水礮二座圍牆一百二十七丈自康熙五十二年始歷年修葺向係鹽院衙門經管道光二十六年奉文裁撤其柳墅行宮風雲雷雨山川專壇此外廢屋木料拆作建造軍裝器械庫房等用

皇船塢房屋船隻俱令網商變價以充公用謹附錄

諭前因淀河修築各項隄工會發帑六十萬兩以資辦理

今隄工業已完竣前項銀兩尙有數餘又前詣盛京賞給辦差經費銀三十萬兩除動用外亦尙有存貯銀兩

著於隄工餘剩項下撥銀二十萬兩盛京差費餘剩項下撥銀六萬兩賞給該督等作爲此次巡幸淀津修葺行宮座落及各處廟宇等費

閏五月

諭內閣德瑛等奏勘明直隸隄河橋道開壩各工一摺並開繕清單繪圖貼說進呈朕詳加披閱此次估修千里長隄各工經德瑛等逐一收驗覈與原估冊報大率相符溫承惠飭屬承修均能如式所辦尙好自此次修築之後不惟保護民田兼以興復水利實於閭閻有裨惟隄工地段綿長每遇大汛盛漲之時不能無汕刷殘缺

若不隨時修補必至日久傾圯既恐貽害田廬兼且重糜帑項殊非經久之計朕本年春閒臨幸淀津諭令將沿途行宮座落派人看守籌款黏補原以其修理本已完善若復勤加葺補則所費無多而工程益臻鞏固况隄工關係民生較之行宮座落更爲緊要豈可稍任廢弛在地方官之意未必不以清蹕經臨變輅駐止處所倍須敬謹修葺殊不知朕省方時巡卽爲閱視河隄求瘼求甯起見地方官正不得稍有疎懈也著溫承惠將此項工程應如何責成地方官定期呈報隨時修補及防護鞏固者如何量加獎勵因循廢弛者如何酌予懲

處務須悉心籌議章程俾不致玩視要工庶隄身永臻  
穩實民田廬舍均資利益卽須酌籌歲修經費諒亦爲  
數無多辦理自易爲力至格淀隄工原係攔截子牙河  
渾水不使灌入淀河從前不惜帑金庀工建築自有深  
意若此時不加修補任其殘廢則子牙渾水灌入淀河  
必致受淤爲患著溫承惠飭令地方官再行詳查設法  
修補卽使無庸修葺亦當將實在緣由詳悉奏聞以憑  
酌核所有文安大城天津等縣各工丈尺與原估不符  
之處著工部查覈具奏

七月

諭內閣昨因天津北河水勢旺盛王家莊一帶又有漫口  
糧船挽運稍艱恐致回空稽緩特降旨派令達慶蔣子  
蒲等分出一人馳往天津會同鹽政伊昌阿將在後船  
糧酌量截留存儲北倉妥爲照料本日據薩彬圖面奏  
向來存儲北倉之米並無專司看管之人以致附近宵  
小任意偷竊從無過而問者請派人稽查又北倉自上  
年修理之後仍多滲漏兼恐存儲之米雨溼黴爛等語  
倉廩存儲米石顆粒皆關正供何至無專員照料所有  
此次存儲米石著責成天津鎮總兵本智酌撥官兵分  
派防守晝夜巡邏並於倉廩四角俱添蓋兵房數間俾

資棲止如有偷竊情事卽行嚴拏懲辦該總兵亦當不時親往查察無蹈疏縱之咎至該處倉廩上年係天津商人承辦今不久旋即滲漏是原辦不免草率並著伊昌阿仍責令承辦之人趕緊修葺堅固所有應蓋兵房亦卽交令妥辦達慶蔣予蒲接奉前旨務卽酌分一人前往天津將截留事宜趕緊妥辦不可延緩至北倉地方存儲米石亦不過一時權宜不應過久並著達慶等將現在抵通各船起卸完畢之後卽將此項存儲北倉之米陸續趕緊運通務於新漕未完之先一律抵壩歸倉爲要



十七年三月

諭內閣溫承惠奏勘明天津靜海兩縣境內急須修濬各  
工請動項興辦一摺天津靜海一帶河道淤墊連年被  
水居民田廬未能涸復有妨耕作自應亟爲疏築以利  
農田但該處地近海濱本係汙下之區必須勘明宣洩  
渠道使水有所歸則修築之後方可收一勞永逸之效  
不致頻年糜帑徒煩工役所有此二處工程著照該督  
所請在於鹽引加價項下撥銀八萬八千八百八十餘  
兩由天津運庫就近發交天津道李鑾宣承領分給各  
委員趕緊興辦並令祥紹不時前往稽查如有草率偷

減情弊卽嚴參究辦工竣後仍著溫承惠親往驗收聚  
實題銷

道光元年二月

諭軍機大臣等據御史鄭家麟奏直隸州縣有借興修水利之名查勘各處已熟水田按畝丈量藉此索詐使費書役四出紛擾天津縣知縣汪本出示委葛沾巡檢傳集各村莊地戶人等逐村挨段查丈又聞葛沾鹹水沾新城等處有勘丈索詐之事等語興修水利開闢稻田原以勸民生穀之道須禁絕騷擾使民樂從方可收因勢利導之益若辦理乖方縱令書役藉端索詐是以利

民之舉轉成擾民之事殊與本意大相刺謬著那清安王鼎於大名查辦事件完竣後卽取道前至天津訪聞查看如天津縣知縣汪本僅止出示曉諭並無不合若竟有胥吏索詐情事卽查明參奏

三月

諭內閣那清安等奏查辦天津縣吏胥因興修水利藉端需索分別定擬一摺興修水利原係便民之舉天津縣境內向有成熟稻田經該督飭查有無荒廢該縣汪本輒卽出示委令巡檢戶書逐段勘丈該戶書謝大年等卽藉端向花戶嚇詐分肥是農田未獲其益而閭閻已

不堪其擾書吏謝大年張恩銓馮樹棠首先索詐俱著發近邊充軍已革巡檢吳學研雖未商同勒索惟於事後收受書吏致送錢文著照所擬杖七十其餘各犯罪名俱照所擬分別發落天津縣知縣汪本於胥役藉端滋擾毫無覺察迨經該督飭禁復潛毀告示抽換卷宗雖據訊無故縱情弊實屬溺職汪本著卽革職示懲失察之天津府知府李蕃著交部議處天津道李振翥著交部察議總督方受疇旣經風聞各州縣書役有需索滋擾情事卽應派員確查嚴究參辦乃僅劄飭查禁亦有不合著交部察議至該省查辦營田水利原應官爲

勸導聽鄉民自行相度開墾著該督將上年部議章程刊發簡明告示徧行曉諭毋任胥役再行滋擾以杜弊端

五月

諭內閣前據方受疇奏天津靜海滄州各屬村莊俱有蝻孽萌生當卽降旨令該督嚴飭該地方官趕緊撲捕本日復據魯垂紳奏稱界連天津之甯河寶坻等縣及山東近海近河所屬亦因風日高燥蝻種漸孽不可不及早撲治著直隸總督順天府尹山東巡撫各飭所屬親行查勘趕緊搜除其接壤之區務協力撲捕不得互相

觀望稽延時日致令貽害田禾

六月

諭王引之奏請頒發康濟錄捕蝗十宜交地方官做照施行一摺本年順天府屬及直隸天津山東近河近海地方間有蝻孽萌生現已飭令趕緊撲捕惟是捕蝗一事先應禁止擾累若地方官按畝派夫胥吏復藉端索費踐踏禾苗則蝗孽未除而小民已先受其害康濟錄內所載捕蝗十宜設廠收買以錢米易蝗立法最爲簡易著將康濟錄各發去一部交該府尹及該督撫各飭所屬迅速籌辦務使閭閻不擾將蝗蝻搜除盡淨以保禾

稼而康田功

八月

諭軍機大臣等據御史李肄頌奏直隸天津河間等處有無知莠民以念經療病爲由不分男女羣居雜處有看香學好等名目或謬託鬼神之名謂之活犄角或以藥水令人洗目使見幻境謂之洗蕪眼種種名目煽惑鄉愚日久結黨成羣難保不借端滋事請飭下該督密行訪緝並隨時化導等語所奏甚是莠民倡爲邪說其始不過惑衆歛錢久而附和人衆往往滋生事端白蓮白陽等教皆基於此天津等處如此他府恐亦不免不可

不嚴密查辦著方受疇督同臬司阿霖慎委幹員認真訪緝有犯必懲不得僅以州縣示禁營汛會查裝點了事亦不得任聽末吏奸胥肆意搜查波累無辜此事總在地方大吏實心化導加意訪察自收除莠安良之效天津一帶距京甚近若該督等不認真查辦養癰貽患將來或經朕訪聞或被入舉發彼時立派大員前往查辦恐方受疇等不能當此咎也將此諭知方受疇並傳諭阿霖知之

諭軍機大臣等方受疇覆奏訪緝邪教莠民一摺據稱現在委員前赴天津河間及各府屬分投嚴密訪查有無



習教惑眾之徒及一切教會名目俟該委員結報後再飭臬司阿霖親赴各屬覆加訪查等語莠民習教傳徒原恐其結黨成羣日久滋事該督現已委員分投查訪如僅係一二無知愚民看香學好惑眾歛錢則該委員會同地方官儘可查拏究辦儻人數眾多該委員等力不能辦則當密行稟報始令臬司阿霖前往督率辦理以除邪慝若委員等結報並無立會奸民巨案遽令臬司大員周歷各州縣覆加查訪不特僕從人等沿途騷擾且各處傳聞轉恐起人疑駭此事方受贖當斟酌事理重輕分別妥辦不可姑息養奸亦不可張皇滋擾也

重刊三才圖會卷一  
將此諭令知之

二年五月

諭軍機大臣等前因御史陳鴻條奏請修營田水利交軍機大臣等議覆請於北省多闢水田兼收南方秔稻之利當經降旨令直隸總督委員相度各河淀水勢倣照雍正年間成規設法經理並多方勸導迄今已閱年餘該省現已查辦若干處是否著有成效朕聞直隸沿海曠地豐潤寶坻天津等處窪地可做南方開爲水田栽稻一二年後即可漸成肥沃著顏檢飭委委員查勘該地方情形如何興修水田實於民生有裨卽行據實奏

明辦理將此諭令知之

諭內閣顏檢奏請動項修濬減河石壩工程一摺直隸滄州捷地減河開壩保衛民田亟須及時修築據該督勘明應行挑淤及築隄等工共估需銀二萬三千七百七兩零著照所請准其在運庫貯備水利生息項下照數動支責成天津道督率該州趕緊興修工竣該督親往驗收毋任草率偷減核實報銷其青縣興濟兩減河宣洩南運河盛漲漕運攸關並著該督察看情形如有停淤應行修濬之處卽著照成案辦理以通水利而衛民生該部知道

四年六月

諭程含章等奏治水大綱請發銀辦理一摺直隸全省水利經程含章會同蔣攸銑督率各道將緊要處所逐一查明奏請先理大綱興辦大工九處如疏通天津海口疏濬東西淀大清河及相度永定河下口疏子牙河積水復南運河舊制估辦北運河修築千里長隄均著照所議分別估辦其請先籌撥銀一百二十萬兩以作工需並請於八九月間解到四五十萬兩先行擇辦著戶部查明廣東江西浙江等處新收捐監銀共有若干萬兩可先撥若干萬兩分晰迅速具奏再降諭旨至秋汛

後或尙有變更俟辦理時隨估隨奏妥議章程責成分  
辦此外如三支黑龍港宜惠濬沱各舊河沙洋沼滋淡  
唐龍鳳龍泉潞龍忙牛等河及應修文安大城新安安  
州等處隄工著分年次第辦理各州縣支港溝渠著飭  
各地方官俟秋收後勸諭農民按畝出工挑挖以資消  
洩至該侍郎等奏稱挑挖築隄占用旗民地畝分別撥  
補給價其將河身官地朦混升科者豁除錢糧免究俱  
著照所請行

九月

上諭內閣前據阿爾邦阿奏長蘆商力日疲請照嘉慶十

四年成案鹽斤二文津貼商人清完積欠經部議蔣攸  
銛程祖洛會查情形具奏嗣據蔣攸銛等奏請酌加一  
文復經部議俟本年秋成後再行察看具奏彼時朕卽  
以鹽斤加價究非朝廷善政所以屢交部議不肯輒允  
所請旋據御史蔡學川奏請停長蘆鹽斤加價縷陳四  
條所奏甚是茲據蔣攸銛等奏秋成後察看引地情形  
仍請酌增鹽價自因秋成豐稔糧價平減商力疲乏積  
欠滋多爲調劑蘆商起見朕思直隸節年被災今歲雖  
獲豐收而民困未蘇豈可再議加徵且據蔡學川所奏  
溯查嘉慶十四年以南河要工加價今長蘆捐辦衛河

袁村等處工需非南河大工可比若加價取償是使民  
代商捐亦屬不成事體蘆商積欠至九百九十餘萬之  
多屢次加價以抵完積欠爲詞及奏銷之期正課頻年  
請緩於帑項仍屬無益况加價之後官鹽愈貴私鹽充  
斥必致官引愈滯商人愈困是恤商而轉以累商也所  
有蔣攸銑等會議酌增鹽價著無庸議

諭內閣程含章等奏估修千里長隄一摺直隸千里長隄  
自高陽縣之劉家溝起至天津縣之西沽礮臺止年久  
殘缺一遇水潦田廬被淹係屬緊要工程自應先行辦  
理據該侍郎等估修隄工及栽葦柳防護椿埽土方工

料銀共三十四萬七千一百兩零著照所請動項修築並分作十段派熟諳工程之河間府知府徐寅第等十五員承辦務照估定寬高丈尺修築隄內文安等處應俟明春水小再行補築仍分段責成現派各員一手經理工竣後卽著程含章親往驗收如有草率偷減遲誤及剋扣等弊卽行據實嚴參此次築隄挑河如占用旗民地畝分別免租撥補其無地可撥者照給地價豁糧如本係官地被民間占種升科者豁除錢糧毋庸撥補給價工竣咨部核辦其任邱縣境內新工係知縣淡延棻於上年領項承修因大汛冲刷卑薄應行賠修該員



業經丁憂著於司庫先行動墊修築應賠銀兩仍於該員名下追繳完款其文安縣境內新工係同知李國昇承修因大汛停工未能補築著仍令該員照估補足該二縣此次照原估加高一丈所加土方俱著歸入大工案內報銷該部知道

十月

諭內閣程含章等奏請擇要估挑河道修築壩橋一摺直隸辦理水利節經動撥銀兩專派工部侍郎程含章會同蔣攸銛妥商籌辦業已次第興工茲據該侍郎等奏千里長隄已築成十分之七因水深冰凍停俟春融接

築其餘應行疏濬各河道自宜豫爲勘定俾工員先事  
講求庶明春興辦易於集事據稱塌河淀上承六減河  
下達七里海請寬晉口河以洩北運大清永定子牙四  
河之水入淀再挑西隄引河添建草壩洩淀水入七里  
海挑邢家沱洩七里海水入薊運河達北塘入海並在  
晉口北岸另開一河及拆造王家務石壩挑挖八道沽  
以下減河均著照所議辦理南運河減河四道與山東  
毗連交錯著屆時先委大員前往覆估俟明秋知會東  
省撫臣同時並辦其捷地興濟二河應行挑展寬深隄  
身卑薄處所亦著確估增培此外東淀西淀爲全省濬

水要區十二連橋爲南北通途俱著擇要濬治修築惟  
白溝盛漲不減清河仍無出路著於明歲秋閒自新城  
十九堡村修復蘆僧河以分白溝上游之勢再開復窩  
河十望中停河宜洩清濁二水俾支河貫輸不致動遭  
水患所有各工該侍郎等派出委員著於明年春分後  
一律動工勒限大汛前完竣驗收並飭令清河天津通  
永各道天津府分投督率稽查如有偷減遲誤卽著指  
名嚴參至估計土方著照通永道成案分別辦理勿許  
工員藉口賠累

五年十一月

諭內閣戶部奏明歲海運米石到津請豫定卸運章程一摺著直隸總督會同藩司天津道並著倉場侍郎督同坐糧廳等查照該部前奏及此次所議各條逐一詳定章程於本年封印前妥議會奏俟具奏到時再交該部核議至海船到津爲日甚速著兩江總督於初次兌竣沙船將次開行時由四百里馳奏到日卽請欽派大員前往天津查辦其初次沙船在上海兌米著卽儘船受兌不必拘一分二分配運以免遲滯沙船到津起卸後空船赴奉天買豆是否有慮耽延致誤二次兌運如何可期迅速之處著兩江總督酌量情形查奏辦理再撥

運米石抵通後轉運京倉仍恐經紀車戶人等尙有偷漏積壓等弊屆時著英和派委步軍統領衙門文武員弁沿途往來稽查以昭嚴肅

諭內閣琦善奏會籌海運應辦各事宜一摺江蘇現屆新漕啟徵商船陸續歸次來年二三月間即可次第兌運開行著責成蘇松督糧道會同蘇松太道看驗米色兌交商船並封儲樣米隨船帶赴天津由交米委員送交欽派大臣比對米色按冊交收其到津以後過剝事宜著責成坐糧廳帶同經紀人等一手經理押運赴通所有江省交米委員在津將漕糧兌給剝船卽已交卸事

竣毋庸再至通倉以免推諉惟剝船自津赴通盤糧不  
無折耗有例應給丁耗米十八萬餘石業經奏准撥給  
商船十二萬餘石尙有節耗米六萬餘石除各項搭運  
節省耗米內應劃給商船外實存米五萬九千六百餘  
石正起運赴津所有天津剝船船耗飯食等項該督等  
請於此項節省耗米內酌量撥給著倉場侍郎會同直  
隸總督妥議辦理至直隸僱剝不敷等款著該督查照  
戶部議覆直隸總督具奏銀數分別籌撥解赴直隸備  
用該部知道

諭軍機大臣等據琦善等奏請來春海運漕米到津一經

欽派大臣驗收後斷無任通倉經紀再驗之理江省委  
員並免其前至通倉等語海運漕糧到津戶部議覆那  
彥成所奏屆期由倉場派坐糧廳一員帶同經紀赴津  
候欽派大臣驗明斛收兌交剝船飭令該經紀一手經  
理今該督等復有此奏著倉場侍郎嚴飭派往之經紀  
人等無得刁難需索一經驗明米色交該經紀等收管  
卽與江省委員無涉所有抵壩交倉一切事宜責成該  
經紀一手承辦其直隸省派出文職員弁沿途照料如  
有剝船滲漏及沿途偷盜情弊該員弁固難辭咎儻米  
色攙雜微變等弊仍惟該經紀是問以專責成而免羈

累將此諭令知之

六年二月

諭那彥成奏大名鎮存城兵少請裁撤海口官兵一摺直隸大名府屬界連豫東二省地居扼要前經添設總兵都守各官並抽撥兵丁分布彈壓惟存城之兵尙少不足以資操防至天津地方名爲海口實係腹地且洋面久經肅清所有現存水師營官兵歲糜帑金無裨實用著照所請將天津水師營裁撤改歸大名鎮惟水師官兵素習海洋不能改充陸路且相距遙遠其應如何分別裁撥添設及一切事宜著該督詳查妥議俟奏到時



再降諭旨

四月

諭內閣琦善等奏海運漕糧到天津用項不敷請籌款續解等語本年辦理海運事屬創始一切用款均無成例可循前經該督等兩次籌款解往天津尙不敷絳夫露固等款銀二萬餘兩此外仍恐有續用之項自應酌量籌撥著照所請准其在蘇松道庫節省漕項內再行撥解銀五萬兩迅卽委員解往天津以資應用俟全漕完竣後按照前後解過銀數查明在通倉支用者由倉場衙門核銷在天津支用者由直隸核銷

十年四月

諭軍機大臣等那彥成奏永定河渾水南徙東淀直逼千里長隄恐妨運道親往查勘籌議修防一摺永定河渾水流入東淀長隄胥受其害該督因東淀楊芬港以下逐漸淤塞致大清河之水與永定河渾水合而爲一俱由楊芬港之岔河經杜家溝歸韓家樹正河行走直逼千里長隄隄出水面僅三尺許恐汛期長水難資保護於運道民田廬舍均有關礙現擬幫培杜家溝隄身原係急則治標之法此外有無別策俾淀不受淤水有歸宿該督現已親往履勘著詳細勘明籌議覆奏到時再

降諭旨將此諭令知之

月

諭內閣那彥成奏勘明渾水淤淀刷隄請動項估辦土掃  
各工一摺前據那彥成奏永定河渾水南徙東淀直通  
千里長隄恐妨運道降旨令該督於親往履勘時籌議  
覆奏茲據奏疏挑永定河下口此時趕辦不及惟有就  
杜家道溝隄身大加幫培並多鑲掃段以資抵禦著照  
所請將現辦各工責成天津道李振翥永定河道張泰  
運分別購料集夫督辦工程如有短缺草率惟該二道  
是問務於端午以前一律全完工竣核實驗收奏報所

有估需工料銀三萬六千八百五兩零卽著在司水利  
本款內照數動撥該部知道

十二年閏九月

諭琦善奏查明天津海口無庸復設水師一摺天津水師  
自雍正三年至今議設議裁已非一次前經降旨著琦  
善察看情形妥議具奏茲據查明天津地處海之西隅  
與山東登州奉天錦州遙相拱衛沙綫分歧非熟習海  
徑者無由曲折而至且海口二十里外有攔港沙一道  
延袤寬廣融結天成儼若海口外衛該處總兵駐劄處  
所距海口甚近控馭既便聲勢相通陸路營伍卽足以

資捍衛所有天津水師著無庸復設以省糜費惟海疆  
既藉綠營爲保障弁兵技藝必須訓練嫻熟方成勁旅  
著琦善督率鎮將認真操演毋令稍有廢弛

十四年四月

諭軍機大臣等御史帥方蔚奏蘆商於浙江藉買場鹽把  
持牟利一摺前據富呢揚阿奏兩浙場鹽缺產請借買  
蘆鹽當降旨著長蘆鹽政祝麟俟浙江委員到後卽作  
速秤掣給發照票毋稍遲誤茲據該御史奏稱浙省委  
員商人已於二月間行抵津門迄今月餘買鹽章程尙  
未議定緣各場竈戶原積有灘鹽每斤價銀二釐有奇

價甚輕減蘆商則欲令浙商在伊等所存坵鹽內售買坵鹽每斤四釐有奇較之灘鹽貴至加倍浙商因坵鹽價貴不欲承買以致日久逗遛等語借引濟民事關緊要不容稍有延緩若如該御史所奏蘆商居奇專利任意刁難浙省委員等抵津已久若不令其趕早買運必致遲誤著直隸總督會同長蘆鹽政秉公查辦毋任蘆商阻撓把持牟利迅速令浙江委員等買掣及時運行以濟民食至浙商向有夾帶灌包諸弊此次借買蘆鹽價值懸殊該商等惟利是圖難保無藉端影射情事著長蘆鹽政嚴行稽查毋令乘機滋弊以肅鹺政將此諭

知琦善並傳諭祝麟知之

十七年六月

諭內閣御史朱成烈奏銀價昂貴流弊日深請飭查辦一摺所奏甚是銀錢價值兩得其平於國計民生兩無窒礙近來錢價日賤自係紋銀不足所致推原其故固由於風俗奢侈耗於內地而洋煙一物貽害尤甚耗銀尤多若如所奏廣東海口每歲出銀至三千餘萬福建浙江江蘇各海口出銀不下千萬天津海口出銀亦二千餘萬一入外夷不與中國流通又何怪銀之日短錢之日賤也前據鄧廷楨奏拏獲出洋紋銀業已有旨將出

力各員弁量加鼓勵並在其將所獲之銀全數充賞惟所拏之數尙不足百分之一且此等奸民情變百出難保不因廣東查拏甚緊遂暗與浙閩諸處交通巧爲透漏是一處之搜不足戢衆奸之偷越著直隸山東江蘇浙江福建廣東各省督撫並海口各監督嚴飭所屬文武員弁統於沿海要隘處所隨時隨地認真稽查遇有出洋快蟹等船務當實力巡查儻敢裝載紋銀妄冀偷漏出洋立即設法截拏按律懲辦毋稍輕縱除將搜獲銀兩全數分別充賞外並著查明實在出力各員弁據實保奏請旨鼓勵如有疏縱亦即嚴參懲辦該督撫受



恩深重具有天良當思紋銀出洋於國計民生大有關係惟當同心協力不分畛域處處堵緝周密卽有奸民何從施其伎倆若經此次誚諭之後仍復奉行不力致有奸民吏胥包庇私運出洋不行查拏者別經發覺不特將沿海各員弁從重治罪定將該督撫等嚴行懲處決不寬貸勿謂誥誡之不豫也

七月

上諭前據御史黃樂之奏請將山東鹽務改歸巡撫統轄當降旨交戶部議奏嗣據該部議准請歸巡撫管理復諭令經額布妥議具奏本日據該撫奏稱該省鹽務現重修天津府志

卷一

戶口

奎光緒戊戌

當設法清釐之際非就近督催難期得力鹽政駐劄天津相隔千里遇有籌議事件稟函往返動須月餘實屬鞭長莫及等語山東鹽務著卽改歸巡撫管理以歸簡易其前經奏准章程各條務當實力奉行認真經理如有應行損益之處著該撫隨時督同藩臬運三司悉心講求總期裕課疏綱日有起色仍符年清年款舊制其運庫出納尤宜留心查察不准再有懸款儻經此次更定章程之後辦理仍無成效朕惟該撫是問該部知道  
欽此

二十年九月

上諭軍機大臣等本日據琦善馳奏英夷要求過甚現在籌辦情形一摺前因逆夷到粵桀驁疊降諭旨令訥爾經額於天津海口嚴密防範現在求請不遂勢漸猖狂難保不分投竄擾天津密邇京畿尤宜慎重防堵著該署督迅卽親赴天津妥爲籌辦該處現祇總兵陳金綬一人著該署督於總兵副將內酌派一員前往駐紮要隘協同防禦惟添鑄礮位尙須春暖開工已有旨於京師運往三十餘尊令置天津甯河等處以備安設堵禦該署督卽行豫備車輛沿途接運儻該逆夷船隻復敢駛至天津等處逼近口岸卽開放槍礮痛加轟擊如再

重刊天津所式 卷一 詔諭  
來投遞夷書一概拒絕不准接收該署督務當嚴飭員弁等加意備防所有應調兵弁著卽酌量調撥妥爲布置仍須計出萬全毋稍冒昧俟布置停當後再行回省辦理

二十一年七月

上諭軍機大臣等昨日會降旨飭令訥爾經額趕赴天津防堵籌備一切並將顏伯璽原摺發給閱看矣該夷兇狠異常行蹤詭祕從前議者皆謂該夷習於水戰若誘之登陸便無能爲故人人意中以爲祇須於海口嚴防毋庸計及陸路交戰今福建廈門之役該夷竟敢登岸

奪據礮臺傷我將兵又據閩省奏稱該夷有僞稱陸路提督名目是逆夷助惡之具百計環生著訥爾經額於各海口分派重兵嚴加堵禦備逆夷竟敢率眾登岸所有火礮及一切設伏機宜務當先事豫籌操必勝之權視奸夷之膽該夷即使登陸各處山岡陂陀未必遽熟路徑我兵出奇制勝前後剿擊似不難一鼓殲擒若祇恃沿海火礮攻擊而陸路攻剿毫無準備迨至逆夷乘勢掩入我兵全無把握豈不自紊紀律何以操勝算而固軍心著該督調集總兵以下大員面告一切機宜並令豫將所鑄大礮一一演試其各岸應如何設兵接應

及逆夷登岸如何四面兜剿盡殺乃止之處均著悉心商辦有備無患陳金綬近在津門諸事自必加意籌辦儻總兵副將以下大員不敷調遣卽著迅速奏調以供驅策至沿海各州縣必須通行飭知激勵將弁團練鄉勇進可以戰退可以守稍有疏虞致令生民受其荼毒惟訥爾經額是問再昨調吉林黑龍江兵二千名將來若有應調之處境內一切車馬務要先期豫備以應急需毋稍遲誤

九月

上諭軍機大臣等訥爾經額屢次奏天津設兵防堵情形

知己布置周而足以禦敵惟北塘一帶甚爲慮念該處兵力已不單弱惟該夷每到一處先用大礮轟擊奪據礮臺再行搶掠是其故智濱海人煙稠密我兵沿岸結營後路又無接應豈非束手受敵廈門等處失事皆由於此爲此再諭訥爾經額妥爲籌畫或將該處商民勸令遷移令其無可肆掠或圍練鄉勇各自保衛該夷來時不見兵丁礮位疑有設伏不敢輕進卽令鼓衆直前而離船稍遠其氣已餒彼時我兵誘之深入待其力盡分路夾攻槍礮齊發使之首尾不能相顧再以各村接應伏兵出其不意痛加攻剿可無噍類矣至設兵原以

衛民必使膽壯氣盛始克制勝該夷槍礮猛烈若我兵無所蔽障志已先沮則兵不能自衛何以衛民其應如何設法遮護使之有恃無恐著該督妥爲籌辦其大小礮位均著安置得宜參差不一或深林密箐或村落陂陀以備賊來抄襲夾攻之用斷不可平列岸前一望而盡該督數月來與鎮將講求韜畧必能領會參變布置咸宜以慰朕念

十月

上諭軍機大臣等訥爾經額覆奏籌議防堵一摺據奏現已諭令沿海各居民添築土堡以爲自固藩籬之計並



令各州縣親身勸導嚴禁胥吏干預其事等語著該督卽廣爲曉諭以百姓之力護百姓之身家勸導有方衆擎易舉其有捐資助餉修建城堡及僱募義勇造船鑄礮者亦卽覈實保奏候朕破格施恩惟州縣賢否不一務當稽查勿令藉端勒索擾地方儻查有州縣科派病民卽著嚴參示儆其有覈實辦公民情愛戴日久著有成效者自當據實保奏以示鼓勵另片奏屯駐兵丁策應等語現在陝西後起官兵行抵天津著卽照議屯駐葛沽地方該處旣屬扼要之區可爲各路應援著訥爾經額卽會同胡超妥爲安插務令聲勢聯絡有備無

患

上諭軍機大臣等訥爾經額奏准備迎夷登岸情形一摺  
又另片奏水陸兼防以操全勝及測量海口水勢各等  
語覽奏均悉現在大沽北塘兩路安置兵礮聲勢聯絡  
層層設伏該夷進則無所障蔽必致全傷於礮退則急  
切不能回船必致慌亂我兵擡礮烏槍趁勢攻勦均足  
制其死命此時天寒冰結夷船夫必遽來明春南風司  
令河冰解釋該督務先事籌畫無一時不留心體察無  
一處不加意防維總使該夷不能近岸我之槍礮已能  
及彼卽令偶被竄入我兵前後左右處處伏兵齊發該

夷方不能首尾相顧諒該督必能仰體朕意相機勦辦以副委任其各海口水勢深淺現已派員詳查著仍遵前旨繪圖貼說確覈具奏至陝西兵丁二千名所帶器械如不適用著訥爾經額會同胡超查明趕緊添造發給以資得力

上諭軍機大臣等本日據御史黎光曙奏天津海防籌備一摺朕詳加披閱所稱天津抵禦之兵宜分三層布置一條早經降旨令訥爾經額與胡超會商將各兵分駐要隘並將陝西兵丁作爲後路應援諒均布置妥協至所稱已設海口之礮挪至後面等語此時亦未便遽行

更張著毋庸議又請飭海口繪圖呈進一條昨已降旨  
飭令訥爾經額等繪圖貼說著仍遵前旨將海水勢  
深淺詳細查明具奏又請將籐牌改用牛皮一條前據  
訥爾經額覆奏試用牛皮不能禦礮均著毋庸議至請  
覈實演驗礮位一條昨降旨令僧格林沁等抽查礮位  
十分之一二猶恐試驗過少不能信心著僧格林沁等  
卽於各海口礮臺之上額外多試數尊務期適用又新  
調各兵宜加撫綏一條前經降旨飭令該督等酌給棉  
衣量予薪炭並諭令會同哈琅阿富僧德一體妥辦諒  
已加意撫卹俾各兵挾纊知恩至所稱天津海口兵丁

滋聞知縣郭紹曾彈壓被其斥罵因躲避不出等語如果屬實必應嚴行懲辦以肅軍令著訥爾經額胡超據實查明辦理毋稍姑容又新調各兵宜選宜練一條此次所用防堵兵弁其本省調取者訥爾經額固已選擇勁旅卽外省所調之兵亦經該督撫提督遵旨遴選斷不致以疲羸充數惟駐防數月之久或兵丁等有始勤終怠及老弱患病等事著訥爾經額胡超陳金綬等隨時留心察看至決勝於一時尤宜鼓勇於平日其應如何飭令帶兵將備講求攻守之法俾臨陣不致張皇束手之處諒該督等必能仰體朕意指示有方又天津土

兵宜廣爲招募一條著該督卽遵前降諭旨飭令州縣  
廣爲召募及早收爲我用如查有匪徒與夷通者嚴密  
拏辦以絕萌芽又招商儲備米糧一條據稱天津食米  
全恃奉天接濟若至防堵加緊之時海汊小口俱已堙  
塞使不及早籌備米糧爾時米船不能進口則人心不  
安等語著該督及早多方儲備毋致臨事周章是爲至  
要總之事貴廣益不厭精詳以上各條其已行者務求  
覈實有效其未行者不妨採擇辦理勿存成見勿掉輕  
心該大臣等晤面之後將一切機宜熟籌妥辦以操勝  
算而固畿疆

上諭軍機大臣等僧格林沁等奏查閱天津大沽海口駐  
兵設礮形勢機宜一摺覽奏甚屬明晰又另片奏試演  
礮位皆能致遠有準朕心寬慰現在大沽海口既有攔  
江沙天險可恃復經該督等於沙內層層布置並各礮  
臺聲勢聯絡兵丁技藝精嫻足資捍衛惟南北礮臺僅  
存防兵二千五百餘名稍形單弱准其將西沽新城駐  
紮原備後路官兵六百名調歸大隊俾厚兵力而資操  
練其西沽新城駐有直隸練勇五百名固原陝勇五百  
名著責令胡超陳金綬分派將弁不時操演期收實用  
至於後路卽以胡超管帶之固原兵二千名留備策應

其賀家口一帶地勢寬展尙可屯兵備撥著訥爾經額  
胡超臨時再行履勘酌辦至礮臺兵丁施放大礮尤須  
運用靈捷方能致遠摧堅該大臣等已諭令各將弁於  
礮兵中擇其技藝極爲可靠者分撥礮臺施放大礮其  
次分撥土埕施放小礮仍著按期分臺如法演習現當  
天氣嚴寒所有守護礮臺兵丁准其每臺酌留兵四百  
名分作兩班五日爲期循環輪換以示體恤

十一月

上諭軍機大臣等據僧格林沁等奏查閱南路海口形勢  
一摺據奏祁口河狼坨子等處分設重兵再於沿海添



設馬撥面商該督意見相同應卽照議辦理其沿海哨探各兵著訥爾經額體察地勢酌定名數奏明籌辦其鄉勇一項祇能各保村莊卽使官爲操練恐臨陣亦難得力總在該督隨時激勸調度得宜庶可以收實效至天津拱衛京師地方緊要迥非閩粵浙江等處可比現在北風司令逆夷未必前來明春東風解凍難保不乘湖北駛若稍有驚動關繫匪輕訥爾經額身任總督且經籌辦年餘責無旁貸必須相度形勢設法隄防不在節節添駐重兵萬不可因府城距海尙遠稍存大意以致臨事周章是爲至要

上諭軍機大臣等訥爾經額覆奏一摺據稱南路海口防兵現已歸併祁口狼坨子齊家莊三處共五百名其餘四百餘名俱撤歸大沽軍營天津城內議添新兵一千名業據左右城守三營招募餘丁足數復於紳商設立救火局內挑選一千餘人並因添兵製造撞礮一百桿又分派鹽務巡役協同地方官所派幹役布列關廂內外梭巡等語所辦甚屬周妥惟團練鄉勇但可使之自衛身家或作爲後隊以壯聲勢至於臨陣衝鋒恐難得力天津府城距海口百里而遙即使該夷登陸斷不能奔馳百餘里直犯府城是該處不必多設兵弁徒勞罔

功不若就河面寬窄形勢擇要設伏或誘之深入或扼其歸路用計用智以謀制勝儻該夷敢由河道內駛定可剿戮無遺若陸路內犯我兵四路抄襲該夷首尾不能相顧必致潰散轉瞬春融卽當妥爲布置著訥爾經額悉心體察豫操成算勿致臨時周章是爲至要又覆奏殷德泰奏招集漁戶團練水勇一摺此項漁戶其烏鎗祇能擊打禽鳥恐難施於行陣據稱現在所募漁戶卽在鄉勇之中自宜就其所長量爲驅使不必強以所難轉致有名無實

十二月

上諭軍機大臣等訥爾經額奏遵旨招募雁戶並於新兵中擇素識水性之人派令雁戶教演等語該處習水打雁民人銃無虛發前經降旨飭令廣爲招募茲據奏此項水勇若一色招募雁戶不能甚多此時各海口招募新兵亦有素識水性均可挑出教演著該督責成沿海州縣暨該管道府先儘雁戶招募如不能多得卽擇素識水性年力强壯之人廣爲招致派令雁戶教演水中打鎗務臻熟練俟募有成數卽專派參遊以上大員管帶所有船隻木筏硝磺柴草一切器具並著多爲豫備該督務當實力實心勤加訓練一經遣派人人得力方

爲有益不得濫行充數以致有名無實是爲至要

二十二年十月

諭內閣天津爲畿輔藩衛現在添設防兵六千五百名之多該處所轄地面綿長舊有總兵一員於操防一切事宜勢難統轄朕意於額設總兵外再添設總兵一員俾得分轄各營專司操練較爲得力因思巴里坤鎮總兵向歸烏魯木齊提督統轄尙可裁撤移置天津其該鎮弁兵卽移歸提標下管理所有巴里坤鎮所屬各營備弁等官能否全撤抑或酌撤數員以抵天津添設額缺之處著兵部核議具奏

十一月

諭內閣訥爾經額奏請大沽設立海防同知一員作爲題  
缺稽察入口出口船隻查驗票照有無夾帶違禁貨物  
及兵民強買盜買漏稅等弊准理兵民客商詞訟其命  
盜重案仍歸縣照辦海疆三年期滿本例陞轉卽於本  
省簡僻同知通判內酌裁一缺等語著照所議辦理所  
有善後經費該督請於蘆綱加價銀內酌撥二十五萬  
兩以五萬兩作爲購備商船建造衙署之用以二十萬  
兩發商生息以八千兩陸續歸本一萬六千兩作爲歲  
費如有盈餘年終報查儘數存儲天津道庫歸入交代

等語准其酌撥籌辦

諭軍機大臣等據穆彰阿等奏詳議天津善後章程一摺  
朕逐條披閱所請將沿海營兵擇其善於臬水勤加教  
練一節各省水師積習僅於近海處所虛放鎗礮遇有  
匪船滋擾不能出奇制勝輾轉效尤幾成故套此次所  
練水兵著訥爾經額明定操期酌籌賞項飭屬勤加訓  
練仍不時親往簡閱期於諳習風潮駕駛得力切勿裝  
點虛文仍循陋習所稱購備商船固屬因地制宜惟平  
時操演臨敵進兵能否資以爲用仍著悉心籌議大沽  
望樓高至六丈有餘本賴以登高瞭望朕意現在旣設

巡哨兵船如果水兵得力有可隨時偵探著該督於明年夏秋閒體察情形或將望樓拆卸其木料留抵別項工用至馬隊資以衝突務須分合得宜礮火利在攻堅期於施放有准酌定防守班期以恤兵力收儲設伏器具以實軍儲均著照所議行再本地商船不准偷越外洋閩廣商船卽在葛沽停泊聽候查驗及上海甯波等處商船酌定稽查章程此三條係爲杜漸防微起見有應移咨江浙等省者卽著該督咨行各該省按照現議章程一體遵辦惟商漁船隻由該縣出結報查驗明執照編列字號開具清冊並葛沽派委員弁嚴禁船戶勒



捐偷盜並上海甯波商船由地方官取具甘結等事恐  
該管官視爲具文虛應故事並胥吏藉端需索著該督  
一併移咨浙江等省飭屬認真稽查嚴懲需索務於盤  
詰奸宄之中仍寓體恤商民之意方爲盡善新設總兵  
一員應在何處扼要駐紮著該督另議具奏至天津關  
廂內外分堡設局團練義勇及場竈民夫編查年貌二  
條旣經行之有效自應照舊辦理至天津永平等處官  
荒地畝如何分飭各府州縣清查招墾納租以資津貼  
以本處地利作本處防費較之加價生息尤爲正大著  
訥爾經額查明奏辦以上一切章程有治人斯有治法

總須行之以實持之以恆此外如有未盡事宜卽由該督隨時籌議奏請施行將此諭令知之

諭天津添設兵丁六千餘名合之原設額兵爲數已屬不少其分撥海口分哨及存城各兵均應時加操練以資熟習現在海疆安靜而思患豫防不可一日無備自當熟思早計安不忘危設或烽燧告警總以火礮爲先其一二百斤之礮尤爲適用多多益善次之以擡槍鳥槍次之以刀矛又濟之以馬隊應如何分布如何會合兩傍如何抄襲後路如何策應埋伏兵丁如何出其不意潛起夾攻無事則列各營有事則聯爲一體務期號令

指揮捷如指臂臨陣方能得力著訥爾經額卽仿照連  
戰陣式諄諭各將備務將新舊兵丁勤加練習併申明  
紀律俾知臨敵皆有進無退庶幾人人用命不致臨事  
張皇至用礮轟擊固賴熟諳礮手方能命中而統率之  
將弁尤不可不專其責成南北礮臺尤應揀派精能妥  
幹武職各一員專司稽查平日與看守礮臺兵丁講究  
方畧庶膽氣日壯施放有準自可呼應便捷無堅不摧  
用收有備無患之效將此諭令知之

二十三年十一月

諭天津爲畿輔藩衛曾經降旨將巴里坤鎮總兵裁撤移

置天津交兵部詳查具奏茲據該部奏稱嘉峪關外設立兩鎮一爲巴里坤一爲伊犁而巴里坤尤爲扼要該處總兵未便裁撤惟伊犁鎮總兵與伊犁將軍駐紮相離甚近且綠營將備向歸統轄可由該將軍就近查稽等語著照所議卽將伊犁鎮總兵裁撤移駐天津其舊有之官弁著兵部酌裁十之二三詳細核議具奏至伊犁屯田兵丁應歸何員專轄兼轄之處並著陝甘總督伊犁將軍參贊大臣會同妥議章程奏明辦理

諭軍機大臣等現在天津新設總兵一員應在何處扼要駐紮昨已降旨令訥爾經額妥議具奏矣茲據兵部奏

請裁撤伊犁一鎮移置天津等語著該督體察情形詳加履勘所有新設總兵應於何處駐紮足資控制天津一帶既有兩鎮其鎮名應如何區別至應行管轄備弁或由現在天津鎮總兵標下酌量分派或將伊犁酌撤之備弁隨同移駐以及一切未盡事宜著一併詳細妥議先行具奏將此諭令知之

諭內閣穆彰阿等奏遵旨會議裁撤西安鎮總兵移置天津一摺陝西西安鎮總兵一缺著卽照議裁撤移置天津以抵通永鎮總兵官之缺其西安鎮裁出兵一千六百餘名准其撥歸撫標兵一千二百名並准其添設中

營卽將原設左營參將改爲撫標中軍原設右營遊擊改爲左營遊擊應設右營遊擊卽以鎮標左營遊擊改撥其鎮標餘兵四百餘名准其歸併西安城守營原設城守參將著改爲副將准其將神木協副將並中軍都司一併改移西安城守營其西安城守參將准其移設神木營所有西安鎮原設官弁裁抵直隸通永鎮添設各缺外其短少員弁著直隸總督於本省簡僻營內裁撥移駐至陝西現在移撥各員是否堪以勝任並著富呢揚阿酌核人材分別辦理

庚申

諭訥爾經額奏遵查直隸地方難以興舉屯政水田一摺  
據奏天津至山海關一帶戶口繁殷地無遺利其無人  
開墾之處乃沿海鹹灘潮水鹹澇不足以資灌溉屯田  
之法勢難舉行至全省水利之說歷經試墾水田屢興  
屢廢總由南北水土異宜民情多有未便而開源疏泊  
建閘修塘一切工費皆需重帑未敢以有用之項輕議  
試行惟地高慮旱地窪慮潦但在地方官於境內溝洫  
及時疏通以期有備或開鑿井泉以車戽水亦足裨益  
田功等語所奏自係實在情形均著照議辦理至南省  
民間用水車汲井戽田需費不多最爲利便見據該督

照式製造發交各府州著卽諄飭各屬廣爲勸導實力奉行如有民間不知此法卽於頒發式樣後勒令按井製車試行灌溉其始未免惜費憚勞如行之有效互相傳造於農功必有裨益用副朕敦本重農之至意

二十八年十二月

諭內閣載銓等奏遵旨會查長蘆鹽務酌改章程開單呈覽一摺長蘆鹽務疲敝已久迭次整頓調劑總無起色經朕特派王大臣前往會同查辦茲據確切查核臚列條款會奏自應因時變通俯如所請試行辦理所有長蘆懸岸四十四處之內河南懸岸二十州縣著盡改票



鹽卽仿照淮北成案先課後引直隸所懸之二十四州縣著予限半年責令各州縣招商招販一律整理儻商販無人卽責成各州縣自行領運或由鹽政遴員官運以濟民食卽責成訥爾經額會同崇綸實心核辦不得畏難苟安此後商欲改票票欲改商皆可隨時體察施行至該處各項支銷浮費著照議停減其引地文武各衙門官役相沿陋規既往不咎著通行嗣後永遠裁汰每年應完內外帑利銀三十萬一千兩零著按額引均攤無論行引行課悉按此數同正課一併核計徵收分款支解遇閏照例加增並此後引鹽每引著准其加斤

免課每斤准其減價敵私皆照所議之數辦理至道光二十七年引課奏銷於二十九年春閒領運完竣後仍於五月內奏銷此後按年照辦著免其提早一月以顧春運而免貽誤其次項積欠銀三千三百四十三萬一千四百餘兩著自二十九年一起按引分攤徵收解部儘有拖欠由戶部指參再緝私章程兵役不如商巡得力嗣後著復商巡舊規以杜偷漏而節糜費凡此數端皆事屬可行而體不爲不至厯年因循玩誤遂致帑本國課支絀不堪經此整理之後訥爾經額惟當會同鹽政崇綸實力奉行認真妥辦務期積弊全除日有起色該

督等具有天良諒不至爲官吏欺朦暗受其把持而不知也

諭內閣載銓季芝昌奏清查天津府所屬倉庫情形開單呈覽一摺載銓等前經派往直隸籌辦鹽務就近清查天津府屬倉庫茲據確切查明具奏天津府所屬各州縣厯任交代正雜錢糧核對款目尙無虛假查點實存錢糧數目亦相符合短徵之員業已分別勒追其現存各庫銀兩穀價或提交司庫或飭各地方官買補還倉辦理均屬周妥此外直隸各屬著責成訥爾經額督同藩臬兩司按照天津府辦理章程趕緊查辦依限具奏

重刊三才圖會卷一 詔諭  
該督等務當認真釐剔確實查核不准絲毫瞻徇經此  
次清查之後朕不拘何時簡派大員順道抽查如有虧  
短捏飾等弊惟該督等是問恐該督等不能當此重咎  
也懍之